



南陵縣志卷之九

列女傳

從來婦德柔嘉婉順節烈著稱乃其不幸貞操用  
敦視死如歸紀之彤管永表芳徽志列女

元趙氏李義實妻年二十四夫亾守節終身事聞於  
朝詔旌其門復其徭役

高氏淑秀王天麟妻年二十三嫁三十一夫亾舅姑  
繼沒攜六歲孤依其父父卒旣葬延師教子獨居  
一室置內外井以勤儉守其遺業時歲饑大雪以

南陵縣志


卷之九

列女傳

一

粟濟待炊者七十餘家及病革語其子若孫曰吾  
今可以見爾父祖於地下矣卒年六十九翰林待  
制楊剛中銘其墓

紀氏催弟紀吉甫女年及笄未字至正乙未長鎗賊  
陷宣州爲周力兒者所獲女觸牆碎首泣曰我寧  
死此遂見殺同時有胡氏者年色方盛賊攻城時  
胡預剪髮自毀及陷徐先鋒者刼令同騎出號泣  
不從徐抱益急胡嚙徐指立斷徐怒殺之弘治中  
巡按劉淮立二烈祠萬曆初郡守陳俊重修並行



記紀南陵人元時住居府城鹿巷口故府志載入  
記宜邑。按紀茂烈呈稱胡氏卽催弟弟婦互異  
仍從  
府志

明張氏觀娘何彭童妻年二十九夫亡事孀訓子姑  
卒鬻衣飾以營葬事績麻治冢以爲子讀書資官  
德間詔旌其門

張氏妙清劉錠妻年十八夫亡遺一女有奪其志者  
以死拒之正德中知縣胡文靜上其事至嘉靖甲  
申詔賜旌表

戴氏汪永亨妻年三十寡子幼姑老紡織以給朝夕  
南陵縣志

卷之九

列女傳

二

撫子克有成立年七十二卒

梅氏柏香王鏞婦也歸鏞及暮鏞沒剪髮自誓立兄  
鏞子爲後居七年富人王爐謀娶之婦詫曰豈未  
亡人尚以色累耶引刀刺左目爐益賂所親日延  
譽左右鏞奪其嗣發其藏困之通於爐將強致焉  
婦度不可持自經卒家一火環室而哭三日斃尸

前郡守劉啟宗致爐鏞罪遷鏞合葬立坊建祠

汪氏德香幼許字童養性未婚養性死德香年十六  
聞訃慟絕往弔遂不復返奉夫木主坐一室朝夕

哭翁姑父母屢諷不移家被火所居獨完人以爲  
貞烈之感旣卒族人卜地與養性合葬焉巡按御  
史魏嘉其貞烈特挽以詩見藝文萬曆十年知縣  
沈堯中令與梅烈婦同祀號雙烈祠

潘氏許承舉妻年二十一夫亾無子抱幼姪爲後甲  
豪有謀娶者剪髮毀容拒之妾周氏年十八同心  
守節至死不渝卒後南戶部尚書畢鏘爲之贊見  
藝文

張氏庠生王疇妻年二十四夫亡無嗣竭力事姑守

南陵縣志

卷之九

列女傳

三

節三十餘年勤紡織甘窮餓人咸稱其爲鐵石心  
腸

汪氏劉鈿妻年二十六夫亡一子幼翁姑欲令更適  
以死誓亡何子亦卒持志益厲紡績度生八十四  
歲終

文氏管世本妻年二十七夫亡貧無錐土子在襁褓  
夫兄逼其改嫁遂自縊妯娌救甦因賃居撫孤成  
立年六十卒

余氏荷香邑儒余岡女適涇人王榜年二十夫亡無

嗣誓志守節有欲奪之者荷香斷指剪髮事聞臺使旌之

王氏曹楷妻年十八楷歿父良欲奪其志引刃裂臉折齒自誓聞者哀之終身不與良通音問兀坐一室者五十年始卒

周氏陶希祿妻年二十七夫亡伯兄連喪頻遇水荒人以改適諷之涕泣誓死撫訓遺孤至於成立年七十終

施氏適監生朱輝年二十輝亡誓死不二立姪思義

南陵縣志

卷之九

列女傳

四

爲後義復早死施偕媳楊氏茹苦守志終身人稱雙節

曹氏孫瑞妻年二十夫亡堅志守節孝事翁姑義方訓子終年八旬

王氏劉邦炳妻年十八喪夫哀痛幾絕事姑至孝撫教遺腹子年九十卒

劉氏王黜妻夫病割股救之及死守節不二躬紡織甘藷鹽歷五十六年終

秦氏監生張維坦妻痛夫卒於京幾絕復甦時年二

十五堅持苦節子茂蘭娶婦胡氏平載茂蘭亦天  
徐氏同姑守節志操愈厲時有雙節清風冊美之  
戴氏鄧時易妻適易三載無嗣力勸置妾易歿戴年  
二十七事翁姑至孝送終善營其墓撫孤子成人  
六 墮先業鄉人稱之

朱氏文三祥妻夫歿年二十五奉寡姑至孝撫遺孤  
終身

劉氏監生戴思宗妻年十八適思宗未幾夫亡翁姑  
憐其少無子欲令再嫁誓死不從撫螟蛉子堅操

南陵縣志

卷之九

列女傳

五

以終

戴氏序班陳直言妻夫喪七日不食善事舅姑和妯  
娒以節孝稱

滕氏管世鎬妻適夫二年夫亡撫育孤子未幾子復  
死夫兄利其改嫁以死誓績紡自給甘貧終身

汪氏曹伯和妻適和三年夫亡父祿憐其年幼欲令  
改節斷髮自誓撫育幼子成人年踰七十終

劉氏張侑妻家貧無子誓死守節嘗遇水荒采菱苕

度日以苦節著

姚氏任宗行妻年十六喪夫遺腹生子廷諭矢志守節撫教成立廷諭以明經仕卒年六十餘

陳氏曹按妻年十八按死無嗣與妾周氏共誓死守又輸田八十畝於水西書院督學并郡縣給扁旌之錢緒山爲著義節傳

何氏孫溟妻二十四歲夫亡守節妾生子棟方一歲族人利其產欲害之何謹爲防護出入必令僮婢與俱後孫輔歷任同知

葉氏孫景週妻年二十夫亡守節撫遺腹子成立及

甯陵縣志

卷之九

列女傳

六

今孫枝蕃衍卒年九十四歲

何氏金妹晉孝子琦之裔幼許郭某未嫁郭以疾沒父母闕其事郭翁具孝服遺之女號泣曰夫死矣立起如郭氏哀毀成禮躬操井臼事翁姑三年服闋走就夫墓曰吾今從君地下矣以頭觸墓磚而死遂葬夫塋事聞賜銀建坊順治庚寅署縣馬逢臬修梅汪雙烈祠民上其狀附祀祠中易額曰貞

烈

李氏劉那周妻年十七適周生二女一男俱殤年二

十三周歿屏絕湯食以殉自矢居十四年叔氏生子國乃立而撫之備經凍餒瀕死自甘爲國娶俞氏生一女國又歿俞亦他適僅與幼女孫相依治女孫出字熒熒獨居者十餘年插棘補屋常至血指日晡不食挑野菜爲羹苦備嘗而志愈厲卒年八十有四孫婿朱懋華立傳

周氏庠生張肇卿妻卿十一歲遊庠周十六歲歸卿當婚之夕卿得疾亾周守節不二立姪師榮爲子又亡二孫俱幼輔之成人年八十二終府縣道按

商陵縣志

卷之九

列女傳

七

各賜扁旌

何氏張傲妻年十九夫亡誓死守中年子歿惟三女孫相依爲命每至不能舉火未嘗有怨言後女孫相繼出嫁就養於姪年八十終

劉氏管一騰妻年二十三夫亡撫孤旣娶婦而孤亡同婦謝氏哺孫孫又死百折不渝卒年七十五

陳氏何沚妻年二十沚亡家貧子幼陳矢不二醮紡

績聊生子方成人又忽溘逝復熒熒撫一幼孫轉

自操作年九十五卒萬曆四十八年按院荆給扁



旌之

汪氏鳳秀葉斌妻年十九而孀子甫半月足不出戶  
紡績勤苦撫孫成立至就木視諸孫曰吾可含笑  
地下矣

徐氏劉邦亨妻年二十四夫亡嘗并日斷炊採野蔬  
充食撫教二孫成立卒年五十一知縣甘文奎題  
貞魂永譽旌之

郭氏葛廷明妻二十五歲寡苦志撫孤事舅姑以孝  
聞父母強另適堅不可奪九十四歲卒崇禎間邑

南陵縣志

卷之九

列女傳

八

令杜繩甲給扁旌之

汪氏張壽元妻二十五歲守節事姑教子七十八歲  
終邑令杜旌以寸心金石

胡氏宋倍妻年二十五倍亡撫遺孤娶婦未幾子與  
婦俱夭遺一孫又撫之成立崇正十五年壽八十  
撫憲徐旌閭曰苦節撫孤

陶氏何天復妻青年守節無子家貧孤苦終老族黨  
欽之

劉氏王明相妻年十七歸王勤織紉以資夫讀夫著

屬文而不售鬱鬱以死劉時二十五歲二子璠璣皆甫離襁褓茹苦撫育之終身不肉食二子漸次成立而劉卒後二子並以高年膺粟帛每念及孀母淚涔涔下也

何氏俞邦吳妻年十八夫死深自閉戢旦夜紡織撫遺腹子應孝成立任湖口縣菱石司巡檢何壽至九十五歲終懷寧殿撰劉公若宰爲之贊見藝文黃氏監生戴天祥妾年二十守節奉舅姑盡孝事孀以禮家頗饒裕出納一惟嫡命毫末不敢自專卒南陵縣志

卷之九

列女傳

九

年八十

王氏葉百芳妻嫁未二載夫亡誓守無二志事姑張氏盡孝撫七月遺孤天相成立嚙蘘茹荼七十餘歲卒

王氏戴士仇妻仇客死河南王食貧守志撫週歲遺孤志瑜有成瑜拾遺金於道命訪其人還之復遣迎父觀歸葬祖塋瑜復早世婦劉氏年甫二十與共苦守撫孫智遊庠序王卒年七十劉亦守至

六十有七終

夏氏梅士升妻年二十三夫亡子二長文極甫五歲次纔週家赤貧勤績緝撫教之上事衰姑養生送死悉拮据於一發婦之手無幾微遺憾卒年六十

三

汪氏庠生汪宸祚妻初婚時聞舅姑數以人丁單子爲念卽力爲夫納媵劉氏陶氏未幾宸祚以應試卒自門三氏年俱二十餘江誓身殉姑哀號曰吾不幸兒死矣猶念劉已姪汝其俟之生男耶守以撫之生女耶死未晚江泣頷姑命起視喪事已而

南陵縣志

卷之九

列女傳

十

劉果生男象琚而悍族之欲奪其產者謀得孺子甘心焉江率劉陶捍禦外侮保護藐孤靡寧寢食稍長擇名師儒傳之象琚弱冠奮起有聲庠序江則又時時以德貴有容毋尊夙忿爲戒卒年七十

一劉卒年七十七陶卒年七十三象琚配秦氏通書史嫺婦道敬事三姑如一江劉先後寢疾秦皆割股以救象琚另有傳江氏雍正五年詔賜旌獎

朱氏戴鈿妻嫁甫三月鈿卒舅姑以痛子故相繼沒朱殯送如禮撫三歲叔成立孀操皦然至八十餘

歲卒

楊氏貢生徐子興元配明末流寇充斥將及境預囑夫曰避亂須於深林傍水處脫不虞猶得死所如其言果遇寇競前劫之急抱女投水夫救之起甫易衣而後寇譟至以白刃遮脅同所掠婦女行稍遠奮身躍入池中死時年十八歲

孫氏吳國仁妻國仁忠臣景後也早卒子友賢甫六歲孫年二十五厲操撫孤入國學大司成姜公曰廣題其居曰忠門貞節巡按御史何疏聞於朝詔

南陵縣志

卷之九

列女傳

十一

旌完節流芳

皇清宦氏秦邦欽妻欽素窘舌畀外塾宦勤繅績膳姑不以憂欽萬曆中歲大祲孀相望於野掇榆自食而以穀食進姑初不令知也欽文試屢躋疽發日卒時宦年二十四擗踊悲號不絕聲以諸子在恨不能卽殉掇拾欽所讀書藏之無寸楮遺素不嫻繪事以意圖欽鬚眉笑貌宛若生平出入必泣飲食必祭訓迪諸子視欽存日加嚴曰爾不可不成爾父志也天啟辛酉子鳳儀舉於鄉順治丁亥

孫仁管才管同登進士鄉人過其廬者爭欲一識太夫人及見之操作不輟粗糲布縞蕭然如窮巷媪也臺使上官鉉題請 詔旌其門

張氏信姑年十四適王有聘三月聘卒會葬屬廣穴以待父母強舁歸服麻茹淡刻木肖夫祀之父母不能奪後以世亂戎馬徃徃遂絕食赴河死援出衣皆紉結面色如生時年二十四

蔣氏禮部儒士謝邦弼妻邦弼年二十七無子術者言其壽止三十蔣聞之自以舉子艱亟勸置媵不

南陵縣志

卷之九

列女傳

三

荅爲聘周氏女強納焉邦弼至二十九歲果病蔣刲股救病稍痊至明年二月卒而周已有姪七月矣已而生子永錫初同室多幸邦弼無子得兼并其產至是忿甚仍各以子爭爲其後蔣恐不利於藐孤分產之平均給之而猶肆侵逼無已蔣訟之官官直其詞族乃貼息永錫至七歲蔣猶不聽跬步出門外也稍長擇師必端嚴方正士以生死託焉晝夜織食糲衣粗至待師賓則必豐必潔年六十二而終稱未亾人者三十二年永錫感奮自

勵有聲於時性孝嘗吮母疽母病日久廢視永錫  
同妻汪晨夕餽之目乃復明以母節未得請旌自  
署所著詩文曰未成人集志痛也子陞康熙己卯  
舉人任無爲州學正

雷氏梁宇妻宇病羹股救不起守節終身所生子殤  
立嗣承祧教之有成郡守秦宗堯旌以詩曰盛衰  
不可料貞節所自爲死生兩不負巾幗勝鬚眉

王氏庠生盛於斯妻於斯盲廢潦倒以卒一女無子  
王二十六歲守節外迫凶荒內蹙貧窶孝侍衰姑

南陵縣志

卷之九

列女傳

十三

奉養無缺卒年八十一

朱氏王可取妻年二十喪夫一子生甫五月堅志守  
節歲屢旱荒夫兄勸再適朱泣曰餓死事小失節  
事大厲操以老邑令姚表其閭

汪氏菊香鮑一怡妻年二十生子方週歲而一怡死  
翁姑勸嫁斷髮明志父母強逼截耳拒之終身絕

聞問已而翁姑相繼逝赤手營葬厲志益堅年七  
十知縣姚自泓上其事於巡撫張公朝珍給粟帛

扁旌曰節凜冰霜

陳氏沈濱妻十九守節七十三歲終初救姑救夫凡  
三剖股終身茹素爨操凜凜前後邑令俱以扁旌  
葉氏明姑徐一瑞妻年二十夫亾砥志撫孤成立孝  
事病姑中帚厠踰手自澣濯歷久益虔人至今稱之  
李氏贈中憲大夫方正範妻子歸後以賢淑著稱宗  
黨相夫子多內助夫病剖腕肉投藥餌救不起遺  
孤長俸六歲次仲甫遇李貞厲自守冰雪皎徹口  
蔬糲躬織紉訓撫諸孤以有成卒年七十四祀貞  
烈祠伸成進士歷官知府貤贈太恭人而例旣封

南陵縣志

卷之九

列女傳

十四

不得復旌伸移書學使趙公崙情詞淒楚聲淚俱  
咽人多不忍讀一時朝端諸鉅公爲賦方節母祀  
貞烈祠詩以慰之

陳氏謝邦宿妻年二十三羹股救邦宿病不愈砥志  
守節父廷梅諷改適陳斷髮跪父前曰兒苟有玷  
願以頭獻屹不可奪親姑以哭子死繼姑吳年纔  
十八歲事之加禮勤教諸子長繩安補諸生孫枚  
膺歲薦者數人九十八歲卒居孀七十四年

秦氏強儒奎妻年二十奎卒子文孝生纔數月矢志

撫孤亡何子天秦抱姪孫迪先以嗣文孝長爲妻  
婦年八十五終猶目擊後嗣振振云

許氏夏一燦妻年二十一燦卒燦病時割股和藥進  
翁聞藥有肉氣怒甚深被詬詈許含淚絕口不言  
至是誓死守繼姑嚴峻勒其改適百困辱之訖無  
能撼其志蓬首垢容三年服除而病已劇其父母  
憐之真以歸隨卒遺一女無子

陳氏姚鳳池妻年二十二夫亡無子撫螟蛉子之壘  
家奇窘甘餒凍惟汲汲營葬姑舅與夫曰此外吾

南陵縣志

卷之九

列女傳

五

無事矣卒年七十三

楊氏庠生黃福妻年二十五福亡子鼎生纔五月母  
強之嫁遂與母絕明末寇亂村里多被焚掠楊每  
避兵必預鍼縷内外衣以備死家奇貧常竟日不  
火勤紡績倦則坐以假寐自爲未亡人卽斷葷并  
絕鹽醬垂老病癱瘓委頓床簀凡八年卒壽七十  
有六鼎見孝義傳

霍氏何志敏妻年二十生子甫週而夫亡父母諷  
適不從厲志撫孤嘗并日而食晏如也卒年八十



文氏庠生何經妻年二十二經亡無子舅姑欲嫁之  
文曰是速吾死耳抱姪爲子教育不啻己出七十  
三歲終

童氏姚鳳雛妻年二十守節子之績甫四歲舅舜璣  
姑董先後俱病篤童兩齧臂肉進皆立愈後數年  
舅卒侍姑寢處以爲常歲大祲拮据供菽水而自  
與子嘗竟日忍饑不使姑知也其父母屢欲逆歸  
辭之曰吾不忍遠姑膝下乃并迎姑至家給田爲  
養八十九歲終

南陵縣志

卷之九

列女傳

十六

崔氏方正士妻正士卒時崔年十九無出貞潔自厲  
有燕巢其室崔時慟哭其夫燕輒翔舞如哀鳴狀  
人謂貞節所感卒年六十四攝宗知府伸以猶子  
啟萊承其祀

葉氏劉一瓚妻年二十守節茶苦備嘗竭力事孀姑  
教孤子萬鵬青年入泮未幾天子婦繼亡又撫孤  
孫臣靖有成遊庠序卒年七十一

葉氏馥貞徐之樞妻年十八歸徐生子烈夫亡生遺  
腹子燦割股救姑病訓撫二子成立貞操至五十

四歲卒

士氏庠生汪會宗妻嫁時方十五歲事舅姑以孝聞年十八夫病割臂救之不起搗踊垂死者再絕粒數日有勸以死易撫孤難者乃強啜糜粥時家中落仰事俯育之資悉取給于晝夜之紡織尤勤教子每自減餐以豐艇脯里有能文直諒友至必命子善畱之絮治肴簌咄嗟立辦大有陶母風子炳康熙丁卯武鄉薦見傳

汪氏施仁芳妻年十八生一子夫亡矢志守節曾有

南陵縣志

卷之九

列女傳

十七

強奪其志者誓死不爲所奪登樓紡績自給絕跡不下樓者數十年壽八十三歲卒

黃氏劉天祿妻未嫁而天祿病癱瘓父欲女他適女以死誓年十八歸劉侍湯藥三載生子甫三月夫亡苦節五十餘年事舅姑以孝稱卒年七十二

范氏庠生葉滌妻年二十夫死哀慟絕食數日姑泣勸再三乃食服除父母逼改適引刀示之終身敝衣不御華綺勤紡織以養姑姑年七十餘始卒范以節壽終

秦氏葉岱芳妻年二十五守節七十歲終苦教二十  
天德天意成立

章氏孫奇逢妻二十七歲夫亡遺孤三歲舅姑欲其  
另適不從茹荼守節至六十四歲終

羅氏梁翻妻夫亡時羅年十九截髮誓守姑老伯與  
姪相繼沒遺一幼姪羅撫姪養姑後以姪之子爲  
孫宗祠歲給米周之年六十九卒

趙氏文學贈右通政劉台瑞妻歸劉八載守節時年  
二十四初夫在病趙日夕部署藥餌乃齋沐籲天

南陵縣志

卷之九

列女傳

六

求代羹股救卒不起拊棺泣血誓欲殉念姑老奉  
養無託煢煢二孤長楷七歲次鞏甫二齡於是銜  
痛茹哀終歲竭十指膏血所儲上供旨甘下資甦  
脯而節縮其餘以旁周宗黨性諳大義勤教子楷  
年十二時郡試不錄召而數之曰汝不憤發自立  
吾異日何以見汝父地下呵撻隨之血流被面外  
王母憐而以帕裹首使去塾中楷乃痛自刻責焚  
香告天矢以旌母節復條編置義田三事後皆克  
副焉隨補博士弟子員年二十領鄉薦北上趙梁

所織布爲寬袍厚裝木棉曰此足前路禦寒矣年  
少幸雋毋得輒御輕裘也嚴毅如此楷後成進士  
歷官卿寺所至著風節每語人曰母氏教也先是  
以母節請旌被有棹楔之榮累遇 覃恩晉封太  
淑人卒年七十有二祀貞烈祠鞏弱寇早世配許  
砥節厲操一如其姑云

王氏學使秦才管繼妻年十六歸秦生子纔七月而  
才管卒王年二十三攜子扶柩南旋未幾子殤二  
女皆前室生長已嫁次幼撫之如已出子初殤時

南陵縣志

卷之九

列女傳

十九

泣請於夫兄仁管以次子雍爲其後保護訓督倍  
至雍後以拔貢考授教諭王曰吾今可告無憾於  
冥冥中矣卒年七十二

施氏姚希儒妻儒病劇謂施曰我瞽母弱息汝責也  
毋忘我言我死不憾遂卒施年二十四鬢跣悲號  
手營殯葬如禮謹事瞽姑飲食坐起悉身親之數  
十年如一日晨春夜織教子紹虞比入泮無喜色  
虞蹠請故曰汝父何在謂我喜耶年七十三卒卒  
時命虞曰葬我須於瞽姑之側姑在時跬步無我

不能行今渺渺泉路將復誰倚我願於地下長相  
隨引導也

徐氏李隆春妻年十九夫亾有富人章明者聞其資  
才託媒灼求婚於翁姑翁姑憐其少也婉諭之不  
從灼乃自向徐盛稱章明之人與家之富徐厲聲  
曰汝去毋多言言唾汝面吾準辦死耳而章明意  
猶未已厚禮幣以求翁允允則約於夜半劫以行  
徐微聞登樓自經姒亟梯樓解救半日始甦自是  
足不踰戶外忍窮苦守壽至八十卒知縣馬國雄

南陵縣志

卷之九

列女傳

二

旌其門曰節榮青史

許氏德妹庠生徐維原妻年十九歸徐康熙甲寅三  
藩叛寇盜蜂起所在奔竄徐鄉居出入路經竹塌  
河雨久水發凡婦女皆僕背負渡河避許正色不  
可曰吾身惟夫得近之僕焉得負我獨留河畔傍  
徨欲歸而寇大至遂投河死越三日得其屍面如  
生鬢髮整束衣帶固結人驚嘆貞烈之不同如此  
曹氏汪顯揚妻年二十二夫亾子士超方週歲曹矢

志不二伯屢逼再醮不從惟呼天明心而已壽八

十郡守龔公旌其門士超承母訓以行誼聞於時  
舉鄉飲賓

張氏陶友瀛妻夫亡時張年二十四謹事舅姑勤督  
孤子使之有立厲操至四十二歲終

萬氏文學李俊妻年三十俊卒子碧八歲夫兄屢諷  
改適萬曰吾頭可斷節不可改也晝則井臼親操  
夜則篝燈課讀碧自塾歸必背誦日所讀書以規  
勤情碧入泮授徒嘗市肉歸奉母怒曰汝但讀書  
砥行不爲父玷吾雖蔬水勝肥甘也壽九十卒碧  
南陵縣志

卷之九

列女傳

三

以孝聞

余氏文學劉錫貴妻王氏其側室也錫貴早失怙事  
母贈淑人徐曲盡子職母亡錫貴以哀毀致病病  
三載卒時余二十八歲無子王年三十生子獻余  
憐愛教篤甚於已出與王氏共厲冰霜者數十年  
嚙屢不逢有司意嘗鬱鬱憾無以將母余曰古不  
有以善養者哉何祿爲明達如此余卒年七十有  
一王卒年七十有六冢孫運鮒成進士官翰林遷  
侍御次孫位爲諸生有聲人咸謂天之所以報兩

貞母也而嚙則猶戚戚焉傷二母之不及見云

陳氏萬民惺妻年十九夫亡一子復殤立姪爲嗣紡績苦守卒年五十四曹氏萬民恃妻二十三歲夫  
平生女無子堅志守節夫兄以次子嗣之憮然曰  
吾今可告無罪於所天矣卒年四十六

趙氏萬福景妻福景少有神童之日善屬文尋卒趙  
年二十五無出立姪承祧性嚴毅鍵戶自守以哀  
慟成疾疾革時泣語舅姑曰吾夫婦不孝俱不能  
終事膝下日其填諸遂卒

南陵縣志

卷之九

列女傳

三

李氏王家室初在室割股救母病既嫁夫病又割  
股救之卒不起子女相繼殤李悲號憂鬱以死年  
二十八歲

任氏吳懋館妻守節時年十九一子甫在襁褓家貧  
如洗人皆勸其改適任剪髮斷指誓撫遺孤樵汲  
躬親事姑如母厲操三十年至四十九歲終

宦氏何懋萃妻年二十三生子纔十八日懋萃死宦  
厲志自守瀕死不移享年八十四親見孫曾一堂

四世含美而逝

奚氏強禹朔妻朔病劇奚割股療不起時年二十五  
念孀姑在不敢言死茹痛營喪葬畢竭力事姑嚴  
督二子終身縞素不與宴會跣步不履闕外七十  
三歲終雍正三年 詔賜旌表

陶氏戴應淳妻于歸兩載夫亡陶年甫二十生子文  
元未百日也姑吳居孀已十年餘矣至是姑婦相  
倚而陶之父母欲奪其志齧指泣曰戴氏三世惟  
此血孤吾誓與孤同存亡且姑老吾忍捨之去耶  
益修婦道課子讀書入成均年五十七卒

南陵縣志 卷之九 列女傳 三

談氏陶克盛妻年十七夫亡生子甫三月守節撫孤  
歷三十八年卒

章氏宗姑初在孕母夢神指架上書曰此宗姑讀也  
因名稍長端嚴不妄言笑好書史年十六歸劉有  
福事兩代姑嫜俱敬而有禮福嘗遲徊不卽就塾  
宗姑正色規曰男子志期遠大古人有編蒲漂棗  
者君何不自勉福由是勤于學未二年福以痘夭  
宗姑慟絕復甦者數四跪祖姑與姑前曰三從  
義夫死從子今無子可從寧死從夫隨撫尸號曰



君行耶俟我三日當相隨矣忽又曰噫吾悞矣不  
爲君三年喪而乃三日耶及發引戒無遠厝厝旁  
舍朝夕哭奠以爲常越歲餘有富人子聞其賢盛  
禮幣求聘於其舅舅未之許適父至父曰是不可  
急當令其母婉勸之因逆以歸數日母微露其意  
宗姑淚含於睫徐曰母尚不諒兒心耶業許爲劉  
氏鬼矣急辭歸剪髮垢顏幽居一室惟啖粥延生  
又歲餘服將除之前五日治酒醴泣告夫墓曰吾  
三年喪畢請踐曩者三日之約自是勺水不入口  
堅餓五日沐浴焚香易衣而逝攝宗知縣繩武爲  
立傳立嗣祔木主於宗祠內之貞潔祠

南陵縣志

卷之九

列女傳

三

劉氏秦鍾岱妻嫁三年鍾岱構危疾劉割臂療臂大  
創血流赤地暈絕久之始甦夫竟不起子方在襁  
褓夫叔某欲奪其志數被凌逼劉憤欲自殺已而  
顧貌孤泣曰我歿汝必無生理如夫祀何哀控族  
衆護持之苦節至五十三歲卒

何氏催娘吳一騰妻年二十二歲騰卒姑楊憫其年  
少無子諭令他適何泣曰婦他適姑誰依寧死不

願聞此言也朝薨暮鹽而姑之甘旨無缺姑至九十七歲卒竭力營葬事終喪乃曰吾事畢矣入室俄傾而逝

樊氏李文質妻文質先納妾樊于歸未踰月妾生子無幾微嫌媚未幾夫亡遣妾而鞠育其子娶婦生二孫子與婦俱夭又撫二孫成立家貧歲荒常自屑榆而食卒年八十

秦氏順姑副使仁管女有夙慧仁管攜之官教以識

字讀書稍長知行文十六歲歸劉甫瑞閨閣中綉

南陵縣志

卷之九

列女傳

三五

書徵事紙筆橫飛居然一良友也未舉子立姪泰煊爲嗣年二十二夫亡自爲文以祭悽惋真摯有足傳者霜晨宵月觸緒悲號煊自塾歸恒爲講說小學孝經諸大義服除哭夫墓幾殞隨病病逾月卒

戴氏王有媚妻年十八夫與姑前後臥病俱剗臂救

夫亡子肇方在襁褓族隣勸嫁誓死不從凌侮踵

至閉聲結齒讓之忍餒凍以教子若孫後皆克振

先霜卒年六十九黃氏王有珍妻珍亡時黃年二

十子廷相在姓方三月耳撫之成立遊庠序有聲黃以節壽終

蘇氏何廣妻二十二歲夫死撫子成立守節至九十歲終

許氏庠生贈知縣劉鞏妻年十九歸鞏越三載鞏卒許哀慟屢瀕於死鞏兄楷痛弟之亡憫許之志以子爲其後亡何子殤許因伯奴泣請曰所賴終賜哀憫不使亾者乏祀惟伯氏之惠楷又以第三子運灝嗣之灝幼羸弱許保抱提攜備嘗辛苦灝亦

南陵縣志 卷之九 列女傳 三六

孝養克盡是時姑趙凜然孀操不啻亭亭貞木聳立霜雪中風漸教濡姑婦相倚姑沒哀毀盡禮砥節彌堅以灝仕贊皇遇 覃恩尋疾卒年六十有四居孀凡四十四年祀貞烈祠先是郡邑大夫采輿論以母節上聞 賜金樹坊與姑棹楔相亞時論榮之伯氏楷慶母與弟婦之並得旌也作雙旌記以示後人

汪氏大妹汪麒女麒遷居懷寧縣旺家山大妹週時許字其地之畢姓名和者和孤苦外出不知所終

大妹待字二十餘年和族有畢三者冒爲和賄媒  
強娶麒不許怒將乘夜劫之麒貧懦且異鄉莫如  
何也大妹執母手而泣俄閉戶自經畢三懼給麒  
急葬已旬日矣里人聞於官邑令王隨往驗視衣  
履縫結甚固時伏暑香聞殯所氤氳如霧令大嗟  
異命撤去己案爐香曰毋掩烈女芬芳巫雪其冤  
上其事於臺司捐俸治葬事樹石墓門廉使董公  
昭祚大書曰烈女汪大妹之墓

胡氏汪大祿妻二十五歲守節至七十餘終邑令杜

南陵縣志

卷之九

列女傳

三七

給扁曰節傲冰霜

徐氏高楷妻年二十五楷卒厲志守節夫叔祖逼嫁  
給以歸寧至中途徐覺墮地泣罵頭觸石幾死凜  
不可奪後爲立嗣壽六十有二卒

周氏劉忠賓妻年二十六夫死夫叔劉至貪其財產  
與氏弟周邁謀逼改適氏斷髮以死拒之終身不  
與弟面不茹葷不一步履門外六十時邑令屈旌  
曰全貞壽母

沈氏葉蕃妻年十七歸葉九閱月而夫卒哀慟不欲

生自念姑老無子且時適有娠飲泣忍死勸奉其  
姑不數月子時可生上事下撫年五十有一終  
牧氏義娘庠生曹登妻年二十二夫亡砥志守節糲  
食敝衣勤紡織事舅姑教育諸子成立年六十五  
終

許氏孫繼相妻年十七歸孫閱八年姑没夫邁危疾  
救以臂肉不起時許年二十五凄風破壁勤織絀  
靡晝夜遺孤謨年十六爲娶婦亡何子亾婦嫁子  
然一身竟夕悲號族人憐之復以姪孫名震者嗣

南陵縣志

卷之九

列女傳

三八

爲孫辛勤鞠育憐更甚於前撫孤時卒年五十五  
孫氏何其音妻年二十適音越七載音亾遺孤志公  
甫週歲孫苦守教之入泮孫壽終學使遂寧張公  
旌曰貞淑遐昌其音同懷弟其意娶周氏一載意  
卒周年十七遺腹生子必達勤儉自勵課子尤嚴  
周壽六十時邑令屈書遐年貞婺旌之又音意親  
姪一嵩娶孫氏年未二十嵩卒無子孫欲自盡姑  
再三慰勸立姪懋彰爲嗣茹苦教育以底有成孫  
年四十餘以節終

沈氏童廷瑄妻瑄幼入泮嗜古篤學沈佐夫勤讀嘗  
共斃女紅未幾瑄卒沈年二十三子二俱數齡姑  
卧病滄股進霍然起又十餘年始卒凡舅姑喪葬  
事命二子與諸伯叔均之曰當體汝父心不可以  
我孀居貧乏辭也年六十餘終

童氏喬艾妻艾以苦讀致疾卒時童年十九無出家  
貧其父使人逆之歸將使另醮童峻謝終身不歸  
獨居一室紡績自給不立嗣惟待死而已年七十  
三病垂革出笥中書帙語姪曰汝伯父畢生精神  
在焉我藏弄五十二年不敢隻字遺汝其永守之  
言訖而逝

南陵縣志

卷之九

列女傳

三九

王氏徐嘉猷妻二十三歲夫死勤苦教子織紵完課  
砥節至六十八歲終

張氏戴志軾妻軾卒時張年十九日夜號泣淚繼以  
血舅姑以存孤泣諭哀稍節茹苦訓子上廩入泮  
食餼年八十七卒賡事母以孝聞畢氏戴志宦妻  
年二十一宦卒閉戶自經者再家人防伺周密不

得死撫叔子爲嗣卒年七十三

孟氏朱仲星妻十九歲喪夫誓死守饑寒困頓百折  
不移卒年七十七

汪氏庠生秦世德妻年十九夫亡食貧守節至六十  
七歲終

胡氏文祖漢妻于歸三載夫亡年十九生子居棖纔  
週厲操撫育艱苦備歷卒年八十二董氏文悌妻  
年二十一割股救悌病不起守節伯逼改適斷指  
明志家貧無所得食時採野蔬充腸撫孤有成年  
六十七終徐氏文有衡妻年十九歸衡踰四載衡  
南陵縣志

卷之九

列女傳

三十一

卒無子有勸他適者以死誓卒年七十八

曹氏孫履端妻年十八而寡初夫病篤曹日夜籲天  
求代屢絕復甦無子立夫兄之子奇馨勤女紅以  
資脰脯馨補邑庠生曹之父母屢逆歸寧曹曰未  
亡人無歸寧禮泣謝之獨居一室晨紡夜織不履  
戶外者凡二十九年終

曹氏庠生張體達妻年二十五體達病甚刲股救之  
立起又三年卒遺二子幼者隨天曹撫長子娶婦  
生孫俄子與婦偕亡復撫孤孫及見成立年七十

九卒

朱氏俞日丙妻年二十四夫亡家貧姑老奉養甘旨無缺越五年被回祿無絲粒存力勤紡織以資贍養一日見隣孀改醮其孤挽衣慟哭手推仆地急登輿去朱感憤自傷曰爲婦不幸而寡何爲久活人世致此忍心入室大哭操刃自裁姑駭奪刃曰汝素孝我今欲死我耶乃止厲操至五十四歲卒何氏來妹幼許字程志廷未嫁聞志廷病篤請於父母往侍湯藥未十日志廷死守制三年孝舅姑和甫陵縣志

卷之九

列女傳

三

妯娌服除治具祭夫墓歸而絕粒五日死邑令趙以抱璞全貞四字旌之

李氏幼知書年十六適戴上簡踰年簡卒子英甫匝月妯娌有諷之嫁者泣曰所不與亡者俱死以此藐孤在耳我豈爲人所鬻耶紡織自給家政肅然英長稍迂意輒命跪而責之年八十二卒朱氏戴上許妻年二十四許卒母令改適死拒之撫二孤嘗挑菜和糠覈以食備受茶苦卒年七十九劉氏戴上助妻助卒劉年十九家赤貧嘗數日不火淡



然安之撫遺孤其龍長生二孫已而龍與二孫相繼死復立孫嗣之卒年八十四

胡氏徐禔妻禔早卒徐誓不改志餒凍自甘至老始

王卒

汪氏陶翼友妻二十三歲守節孝事舅姑無嗣後數

年立姪承祧壽八十三歲卒

戴氏謝德修妻年二十七夫亡生子二長六歲次彬

甫四齡家奇窘吞聲飲泣勵節彌堅至六十四歲

卒彬補邑庠生每言及母節輒霄淚如雨

南陵縣志

卷之九

列女傳

三

鄧氏張景星妻二十八歲守節康熙癸酉間饑饉薦

臻道殣相望鄧竭力養姑舅撫兩孤相保無恙舅

嘗泣語人曰可憐今歲我媳惟知糠味也迨姑舅

繼沒賣所居室以葬之攜子借棲姪鄧林棟家以

苦節終

王氏葉正綦妻年十七歸綦綦病六年王侍藥歷寒

暑不懈一夕綦垂絕救以臂肉頓甦又六閱月乃

卒家被盜人皆奔竄王亦升屋以避俄聞盜執其

姑急奮身自峻簷躍下負傷恐痛衛姑盜義而釋

之去孀居五十四年至七十九歲終

何氏張甦妻年十七夫亡無出貞厲自守六十四歲

俞卒郡邑咸旌以扁額

汪氏庠生吳瑛妻瑛卒妾生一子汪年二十六無出

人有以他適勸者汪曰吾無子妾子非吾子耶乃

未砥志厲操偕妾撫孤成立卒年七十四

李氏王文選妻徐氏文選弟茂達妻文選卒時李年

二十八茂達卒徐年二十一妯娌形影相依厲志

苦守各撫孤有成李九十二歲卒邑令旌其門徐

南陵縣志

卷之九

列女傳

三三

亦以壽終

谷氏秦瀾妻瀾卒時谷年二十五事舅姑撫孤子艱

苦備歷五十八歲終

朱氏庠生馬一鳳妻鳳以闈試感疾卒朱年二十七

子國佐甫八齡朱砥節教之嚙藥茹冰至七十歲

終邑令趙旌以貞操永年

俞氏年十八歸王家上二十四歲夫亡時姑年八十

三俞與同寢處一夕盜劫隣家勢將及俞念妾之

去不忍坐以待不可因肩負老姑手牽幼子以避

盜入室虛無人矣盜退隣人跡於村外麻塢中得之復自負姑以歸

徐氏汪一璋妻二十七歲守節歷二十四年卒王氏汪源邃妻二十三歲守節至六十歲卒

朱氏年十六歸陶德昭越四載德昭卒生一子茹苦撫教之子亡又撫孫孀居歷四十八年卒邑令杜旌曰高映懷清

謝氏吳尚亨妻生六子而亨沒謝年二十九幼甫在抱拮据捋茶俾各有室幼子爵補邑庠生謝七十

南陵縣志

卷之九

列女傳

三十四

五歲以節壽終

汪氏張運旋妻二十八歲守節孝事瞽姑撫育藐孤以有成立卒年七十

鄧氏俞侶賢妻年二十三夫亡子巧臣纔二歲舅年七十餘久病委頓夫從兄某悍暴無人理逼鄧改適鄧號泣曰伯欲我去恐立視我病舅孤兒死耶拒不從遂肆箠楚鄧引刀自決乃止舅沒鬻產葬之歲丁亥戊子間奇災異荒鄧義不受憐日惟閉戶飲水於是年冬餒凍以死

胡氏汪元誥妻年二十而寡一子生方數月有逼再醮者投河拒之家貧復被火地無立錐盜無餘賸竭蹶以終養舅姑撫子成立卒年六十三

何氏郡庠生陶達甫妻歸陶二載夫亡閱兩月生遺腹子紹紹幼多疾何以哀毀故乏乳時時抱兒泣聞者悲之紹稍長卽飭以禮法就外傳循時察其勤惰以誠勉之故克自成立爲諸生有聲何終身縞素言笑不形闖闖不出年四十八卒

何氏王楨妻年十四卽割股療祖母疾旣于歸姑病

南陵縣志

卷之九

列女傳

三五

復割股救之皆立愈二十時夫病又羹股進不起  
忍死守節教育遺孤七十四歲終

沈氏徐一召妻十八歲夫亡遺孤學忠生纔一月茹淚撫之羹股救姑病病痊守節凡四十二年卒

何氏程學和妻年十八嫁嫁七年夫亾守節撫孤鏡有立不忍姑年老長齋亦自持齋代之至六十歲卒邑令王旌以扁額

任氏劉應賡妻幼過劉門性孝謹舅姑極憐愛之年

二十四應賡病刲股進不愈三子皆幼家酷貧姑

勸再適不可姑病又勸股救之苦節至老始卒邑令趙旌其閭

章氏佳英幼許字曹元輔未嫁聞元輔訃卽矢志守義居一小樓終身不下年八十髮盡赤邑令旌曰幽貞遺世

吳氏王的秀妻割股救翁病事繼姑惟謹年十八夫亡奉夫木主於室內所遺書籍皆陳几上一如生前飲食必祭祭必哭不踰年而死

段氏光祿楷長子知縣應熙妾熙卒時段十八歲誓

南陵縣志

卷之九

列女傳

三

死守其正室王生有七子未幾王卒段撫其三幼子恩勤備至光祿憐之命以第七子弘捷爲其後厲操以終

於氏汪巨山妻年十九嫁纔週而夫亡舅姑相繼沒於食貧堅守宗族憐而給胙穀周之以悲哀成疾三十九歲卒

梅氏劉玠妻玠亡時梅年十九父母強其再醮不從欲立叔之子爲後叔難之梅哀號絕食曰我以叔列官墻必能念亡兄成我志今乃不然我不如死

也叔因以次子承其後苦節四十餘年卒

章氏汪銘明妻明素孱弱以攻苦致疾章療以股肉不愈卒時章年二十八生遺腹子本璽教之有立母家常逆章歸辭曰非不欲歸義不可耳深自閉戰不履戶外凡二十七年卒

王氏朱懋填妻二十歲守節于孺生纔二歲事老無幼備歷艱辛卒年九十有三邑令馬旌曰勁節貽芳

王氏徐一鑰妻一鑰病王救以股肉不愈及翁病又

南陵縣志

卷之九

列女傳

三十一

割以救病隨愈越數年始卒王自二十歲守節以壽終臺使衛旌曰孝純節苦

方氏汀州郡守伸女數歲時父教以內則孝經諸書語節義事輒竦然敬聽其天性也年二十適文學張翔翔讀書外家間歸恒以勤學相勸勉亡何翔病方謹視湯藥忘食寢者數月潛籲天求代羹股救不起擗踊投繯矢身殉舅姑泣諭以撫孤爲重乃茹淚治喪殯如禮事舅姑孝謹備至甘旨柔滑非手治不敢進得舅姑歡方生於紈綺而性樸儉

嚴肅寡笑言居孀終身縞素自奉甚薄而必豐腆  
以待師賓欲其子知所觀感切劘以有成云卒年  
六十一

盛氏邵重妻年二十七守節隣媼數以家貧難守勸  
改適盛怒嚙斷一指吐地示之指在地猶躍起數  
四見者驚愕泣下事姑尤孝一夜盜劫其隣之富  
室而不得突入執其姑使指引盛亟以身衛姑刃  
傷左臂仆地右手仍抱持其姑不捨盜爲感動釋  
之去厲操至六十六歲卒

南陵縣志

卷之九

列女傳

三

朱氏李時衡妻有娠方五月衡病篤泣謂曰我死汝  
奈何曰君無我慮又曰汝青年也朱乃嚙指灑血  
滿衣曰藏此爲信衡卒越五月生子保護備至稍  
長出父遺書泣授之曰汝宜奮發慰父九泉旣而  
授室有孫又督課其孫故今孫枝多能文者當去  
之初卒也上有老姑以哭子屢瀕於死朱乃輟哭  
時解顏相慰勸而私哭於他所有見者必囑曰毋  
使吾姑知也家故貧又大荒無從得食隣有餉者  
却不受辟蠶易米養姑哺子而已嘗終日忍饑不

言會有富人王姓者以重聘求婚於姑朱亟引刃加頸血流被體人奪刃救得不死七十二歲示疾乃自服其曩所藏血衣而卒

劉氏幼曾嚙臂救父及笄適潘文生於舅姑及夫之病又皆割股救二十八歲夫亡有勸再醮者乃服毒垂死妯娌救之甦撫遺腹子成立家有數喪夫在時欲葬未能至是劉悉葬之其曲成夫志類如此劉氏潘懋彭妻年十九夫亡苦節至五十二歲卒學使謝旌曰冰操永矢

南陵縣志

卷之九

列女傳

三九

馬氏袁秉松妻二十六夫亡無出家赤貧閉戶自守誓不絲粒乞憐于人晝夜勤紡績自給銖積寸累久之量自存備衣衾喪葬諸費外悉以助修橋梁周貧者年五十五以節終

何氏王家繼妻二十一歲守節卒年七十四葉氏王家粹妻二十五歲守節卒年六十三張氏王家翰妻二十五歲守節卒年四十四三節婦並割股救夫病而何獨割有三次葉當夫叵時姑年七十三勸哭其子暈仆地死逾日始甦遂病葉晨夕飲姑



以乳久之復健壽躋八十餘至子羽譙譙子尾脩  
脩風雨飄搖而卒使藐孤俱克自成立者則三節  
婦之所同也

王氏萬應前妻守節時二十三歲無子立姪爲子躬  
織紉以教之性嚴毅動循禮法孀居數十年不一  
步踰闕外卒

王氏范大弘妻二十八歲大弘卒王拮据成家教子  
遊泮貞操至六十六歲終

張氏庾生汪偉妻偉病張療以股肉不愈遺孤自英

南陵縣志

卷之九

列女傳

四

方數齡內外無親舅姑相繼歿喪祭盡哀盡敬族  
黨稱焉自英稍長嚴立課程督教之時遣問益於  
邑中諸名宿故自英弱冠卽食餼後課諸孫一如  
課子垂老不倦卒年六十有三

孫氏葉涵妻年十九于歸未一載涵卒遺腹生子祇  
節撫育之而家世單傳外侮踵至孫卒能戶牖綱  
繆教子有成爲名諸生性仁慈時以扶窮濟急爲  
念人有求雖窘中亦必多方應之垂沒猶諄命其  
後人隨力行善云年七十六歲

李氏十六歲適王五先明年歸視母病聞醫言病不起潛剖股投藥中母霍然起又數年夫病李私念曰吾股可以救母獨不可救夫乎羹以進不愈乃矢志撫孤成立孤復殤悲慟以死年四十一

高氏劉啓妻年二十夫亾生子纔三月矢志撫孤舅姑強再適輿已及門高閉戶自經人排闥入救已絕移時乃醒砥節至六十五歲終

湯氏李宗橋妻守節時年二十一弟與夫弟合謀逼嫁屢以死拒之歲荒嘗自飽糠粃留米養姑姑弟

南陵縣志

卷之九

列女傳

聖

潘泗水官黃州司李歸憐其節孝時以米餉辭不受曰姑吾養子吾撫無勞分惠也介性如此

方氏吳玉妻年二十八夫亾子二長三歲次遺腹生誓死守節勤操作以事舅姑姑病剗股進乃瘳夫無兄弟舅姑沒竭力營葬焉

孫氏劉一峻妻二十四歲守節性嚴肅居恒自親姪以外人罕識其面孝事老姑勤教諸子有九熊畫荻風子若孫俱爲諸生有聲

紀氏王有秀妻夫亡時紀二十三歲無子夫伯勸再

適不聽歸母家母亦以爲言憤曰人所異於禽獸者以有節義耳今欲我爲禽獸耶遂奮身投入金獅港中援之起乃自立嗣紡績爲生薪水皆自力子長爲娶婦營地葬夫并先世四代未葬之喪悉葬焉

陳氏吳孚妻二十九歲夫卒隨剪髮納夫衣紐中持節嚴峻母家銅邑富室也屢逆歸終身不一往貧苦自安舅姑壽皆八十餘侍養倍謹陳後亦八十八歲卒

南陵縣志

卷之九

列女傳

聖

吳氏何天翼妻守節時二十九歲姑老子幼一身勞瘁謹事其姑姑善病扶持抑搔不頃刻離姑時悲憶其子輒欸欸慰解之姑常語人曰我幸有孝婦也子七歲卽令就塾偶廢學必曳而跪諸庭榎楚之稍長喜其與勝己者處有端人良士至不惜剪鬚延之故其子以力學有聞吳卒年四十有九

崔氏年十八適陶之愷勤勸夫學夫病剖臂療之不愈舅姑年老倍極孝養督課遺孤俾遊庠序年五十時知縣杜源額旌之後至八十三歲卒

陳氏夏一鸞妻鸞卒時陳年二十七堅志厲操而室如懸磬其姒亦孀也家頗饒裕舅姑在堂妯娌輪養陳每先期節粒減餐調甘旨以待不敢以貧窶爲辭也初遺孤二歲時痘邁危症氣微屬逾日矣陳號泣於廟曰願減己年毋斬夏嗣已而兒復甦後娶婦生子稱克家云

孝婦附

許氏陶克綏妻事姑朱至孝自于歸後與姑相依如女事事先意承志姑每以孝婦呼之康熙戊午姑病許侍湯藥衣不解者年餘密嚙腕肉和藥進病旋起又越二十餘年卒許哀悼毀瘠晨夕上膳於靈几三年如一日

李氏王曰渤妻年十五歸王力修婦道事姑胡尤謹

居恒奉養必誠必慤而侍疾於委頓床簀之時湯藥必嘗而後進寢餐俱廢凡五閱月迨醫謂不可爲而李涕泣彷徨伏地顛天糜股療之復愈人咸謂爲誠孝所感迄今李沒而稱之者無異辭

論曰陵邑列女傳舊志三十有九新增一百三十

有八又附見凡二十有一載筆至此不禁掩卷三  
嘆也夫閨閣翬笄鮮諳大義而窮簷庶賤尤罔涉  
詩書乃志操一定之死不渝其未字而貞夫死而  
殉者比比也又或饑饉頻仍戎馬充斥兼以子殤  
姑虐內難外侮迫脅萬端而終無能移其志誠有  
烈丈夫所難能者豈天地之正氣獨鍾於女婦哉  
何節烈若斯之衆也余憐其遇悲其志旣已核實  
不忍過削然猶念深山窮谷之中其湮沒而不彰  
者不知幾何矣嗟夫

南陵縣志

卷之九

列女傳

四

南陵縣志卷之十

流寓

麟遊於圃鳳翔於岡地非名勝靈異焉藏企彼芳  
躅借託斯鄉風流宛在山高水長志流寓

唐李白字太白隴西人游江東寓南陵題詠最多今

五松山新酒坊皆其遊樂之地詩見藝文志

宋鄧道先南陽人乾道間官至尙書幕南陵山水卜

宅而居葬夫人章氏石龍山建庵以守見石龍庵

記

南陵縣志

卷之十

流寓

劉有慶蜀郡人初任邑主簿遂家焉後官至翰林待

詔號損齋子鑄登元進士

文小二字佐甫涇邑震山人宋嘉定二年任南邑主

簿官仁愛及考績當遷父老泣留遂致政卜居分

界山

明羅思忠廣西象州人洪武十五年由進士任知縣

隕浙江僉事邑人深德之留居本邑因占籍焉

馬傑湖廣麻城人元末任歙縣知縣因兵亂洪武四

年移居邑東門

甘澗湖廣人洪武初知縣事三載遷蘇州郡丞父老  
泣留因爲春穀萬公卒祀名宦墓在東門隅萬曆  
十二年知縣沈堯中立石墓所表之仍查絕產田  
三十畝給裔孫甘時中爲祭費

隱逸

彼競顯榮此甘肥  
遯結契煙霞遠  
超塵壑一壑一丘  
無愧無悶允矣  
高風懷哉餘韻  
志隱逸

明劉章甫性恬澹少不樂仕進喜吟咏士大夫慕重  
之邑令雷燧贈以詩刻於縣廳

南陵縣志

卷之十

隱逸

二

劉允迪章甫孫善書法永樂初徵楷書弗就號中山  
書隱以見志

王源字惟遠幼抱遠志慨然慕陳白沙莊定山爲人  
以畊漁自足暇則讀書成化間邑丞謝文祥嘉其  
高致造廬賡詠必竟日始去著東溪詩集

方海號東郊樵叟博通今古邃於詩文不以利祿經  
心惟力行孝弟遇子弟諄諄教以禮讓鄉人化之  
遂成善俗人皆稱爲隱君子

皇清王學箕字禹疇幼穎悟以麟經有聲庠序善詩

古文詞性磊落不羈每讀書暇卽從諸少年酣飲  
暢然自得以爲常野貌古心隱居不出卽再食不  
飽百結不完恬如也沒之日貧無以殮友朋共佐  
助之

仙釋

舍正取奇厭常喜怪解脫逍遙烏能涵蓋雖曰其  
人吾道之外節取備觀不攻奚害志仙釋

梁杯渡無名字嘗浮杯而渡卽以名建興雲寺於行  
廊山又建隱靜寺梅聖俞遊隱靜寺詩昔聞有禪

南陵縣志

卷之十

仙釋

二

子涉江用杯浮樓心由茲地埋骨在林岷

宋懷義開化寺僧不剃髮或問故曰當剃心耳熙寧  
七年四月八日詣崇教寺浴訖嚴服日午於觀音  
庵垂足危坐右手持印左手按膝逝有清煙上騰  
收得清承天觀道士精導引術有谷客者遇訪弟子

謝不爲通客索茶蘸瀝題几云蓬島三山在寸心  
先生何事混凡塵不因門外家人謹還是無緣遇  
洞賓覆盂去堅不可舉弟子以告牧追至門橋見  
一醉人枕二瓶臥後五年復至假寓共奕閱三日



牧始勝一局客曰寓機於目識陰陽之盈縮可以不覆牧警曰先生呂公耶曰枕瓶丐耳相顧抵掌牧乃長吟曰完得一局棋除此一襲衣何去何來兮白雲共依稀吟罷撫客而出視坐中衣若蛻然後人於橋建閣祀之名曰降仙橋

**皇清**沈鼎彥字禹鉉承天觀道士工詩善書法尤精修鍊著有黃庭內景外景經直解萬五千餘言汪孝廉師退讀而異之許爲序會病未果宣城梅徵君勿庵過訪問以青松黃石之學白簡青簡之箴

南陵縣志

卷之十

仙釋

四

衝口而荅如數家珍徵君歎曰是深有得於斯道者壽八十五無疾終

南陵縣志卷之十一

藝文

含英咀華出經入史鼓吹休明國之綱紀金石雕  
劉赤城霞起莫使羽陵蠹生締几志藝文

藝文一

疏

晉

何琦 邑人孝廉

論祀典疏

南陵縣志

卷十一

藝文一

一

晉穆帝升平中何琦論備五嶽祠曰唐虞之制天子  
五載一巡狩順時之方柴燎五嶽望於山川徧於群  
神故曰因名山升中於天所以昭告神祇饗報功德  
是以災厲不作而風雨寒暑以時降及三代年數雖  
殊而其禮不易五嶽視三公四瀆視諸侯著在經記  
所謂有其舉之莫敢廢也及秦漢都西京涇渭長水  
雖不在祀典以近咸陽故盡得比大川之祠而正立  
之祀可以缺哉自永嘉之亂神州傾覆茲事替矣惟  
濡之天柱在玉咯之內也舊臺選百戶吏卒以奉其

職中興之際未有官守廬江郡常遣太史兼假四時  
禱賽春釋寒而冬請冰咸和迄今又復隳替計今非  
典之祠可謂非一考其正名則淫昏之鬼推其糜費  
則百姓之蠹而山川大神更爲簡缺禮俗頽紊人神  
雜擾公私奔惑漸以繁滋良由頃國家多難日不暇  
給草建廢滯事有未遑今元愍已殲宜修舊典嶽瀆  
之域風教所被來蘇之衆咸蒙德澤而神明禋祀未  
之或甄巡狩柴燎其廢尙矣崇明前典將俟皇輿北  
旋稽古憲章大釐制度俎豆牲牢祝嘏大辭舊章靡  
不見省

明

南陵縣志 卷十一 藝文一 二

何 燧 邑人戶科給事

上五事疏

嘉靖四十一年九月戶科都給事中臣何燧條陳五  
事一曰寬民力近年有日事誅求民不堪命卽以南  
直隸言之有加派養兵銀兩矣有坐派料價矣而軍

門之外復有操江之募兵兵備道之壯丁府州縣之鄉兵焉料價之外復有採木顏料等項預徵勸借等名焉而當事者或已停而復徵或借一而科十俱當嚴革仍以明年爲始將民間額派錢糧銀數每家給一信票令官民各如票奉行有別名色者罪之其正賦積逋之數仍行各撫按官查係上年所欠者嚴限完解其三十六年以後每年帶徵三十六年俱暫停征如解侵欺者仍清解如故二曰懲賊吏近奉明旨令犯賊官從重提問而所司難於任怨未見舉行請

南陵縣志

卷十一

藝文一

三

申明前旨凡滿貫以上盡數追完方許發遣不惟貪吏知警且因而可以佐國用三曰重糾察人主深居九重而欲見吏之廉污於千萬里之外聞民間之悲歡於深山窮谷之中持巡按爲之耳目耳今或善事上官者雖貪殘得舉孤蹇寡與者雖清白見誣近欲嚴劾異同之罰固救弊一說然舉劾大同者亦未必不隨聲附和况巡按官事權極重督撫恐失其欲心尤易行私必吏部秉公以持群吏之是非都察院據法以嚴回道之陟黜而後上下相維吏稱其職矣四

曰正士風士風不正則請謁繁請謁繁則苞苴盛卽如巡撫秩尊任重然一過地方有事士大夫視如火坑苦海廷推一及遽而倉皇涕泗當必旨意旣下勿容推避則請謁少而苞苴不行矣五曰禁奢靡廷臣每遇歲時筐篚交通宴會雜遝窮水陸之珍恣歌舞之樂而百技藝亦且日事淫巧以圖重利皆傷化糜財漸不可長宜重懲以法疏上奉旨以寬民力一事下戶部照所派年分催查正賦錢糧不許一槩併征以懲賊吏重糾察正士風下部院從實舉行以禁奢靡一事下禮部出榜禁革仍示大臣科道各加儉約以爲衆先欽此

上財用疏

嘉靖四十一年十月戶科都給事中臣何燧爲帑藏匱乏歲用益繁懇乞聖明早賜計處以裨時艱以固邦本事臣竊惟我國家理財之法最爲中正歲入旣有常經歲出亦有恆度蓋不啻周官之九賦九式然也加以我皇上恭儉愛養四十年於茲固宜國有九年之蓄家有百室之盈乃今觀之殊大不然臣反覆

思維推求其故大抵內外之冗費太濫邊臣之請乞太多逋負之禁例太寬貪殘之培尅太甚四者不去而欲求財之豐終不可得矣臣敢披瀝愚衷爲我皇上陳之嘗聞唐陸贄曰生物之豐歉由天用物之多少由人不節雖盈必竭能節雖虛必盈此古今不易之名言也今內外冗費奚止一端前後諸臣之建議該部之題覆亦無慮數次然皆視爲虛文苟且塞責其所裁革不過千百中之二三耳無有爲國任勞實

心幹理者夫開財之源不如節財之流我皇上登極

南陵縣志

卷十一

藝文一

五

之初一次冗官歲省倉糧百餘萬近者光祿供應一經查刷歲省帑銀十數萬此其明效大驗也臣以爲宜勅下部院諸大臣或專勅科道官二員會同各衙門將一應冗濫如軍校廚役匠作等項並官之當革者事之當省者通行查議着實舉行毋煦煦以市恩毋泄泄以將事省一分則受一分之益積一歲則多一歲之用去蠹補贏此其首務未可以爲細故而忽之也至於各邊王客兵馬錢糧原有定額自嘉靖二

十九年以前間有請討數亦無多今則日增月益不

知其幾相倍蓰矣如大同年例原止七萬兩今則加至五十四萬有奇矣宣府年例原止八萬兩今則加至三十三萬有奇矣延綏年例原止三萬兩今則加至二十七萬有奇矣薊州密雲昌平平原無年例今薊州加至四十餘萬密雲加至二十餘萬昌平加至七萬五千矣他如遼東歲加至一十七萬山西歲加至一十一萬固原寧夏甘肅等鎮亦皆歲有增益大約通計一歲供邊之費須二百四十餘萬其數已益於太倉之歲入矣而各邊諸臣猶以爲未足連章累牘

南陵縣志

卷十一

藝文一

六

日事請討夫師行糧從固難責其不費然不知果能調遣以時無復冒濫之失出納有經無復侵漁之弊乎臣未敢以爲盡然也夫今歲之加增卽來歲之額例歲歲相因將安底極伏乞天語丁寧各邊督撫諸臣今後務要視國如家多方撙節不許妄行奏討該部亦不許輕爲題覆庶滄海之漏卮可塞而邊鎮之費用有經矣臣又聞各邊之匱乏皆由於民運之拖欠民運之拖欠皆由於有司之貪殘夫民者邦之本財者民之心今天下之民困苦已極所賴以生息餉

然惟在郡邑諸有司夫何邇年以來廉靜者少貪墨者多巧肆漁獵陰懷壘斷公家之賦稅未充而私囊已盈積歲之逋負未征而科罰已甚荒年之賑恤未聞而脂膏已浚是何異牧羊於狼而欲求其孳且息耶近來撫按論劾多詳於貢舉而略於甲科多行於通判等官而不及於郡守至藩臬則率有舉而無劾此貪殘之所以日肆而民生之所以日瘁也誠宜勅下吏部申明法典急洗頽風慎之於選用之初嚴之於考察之際但有贓迹顯著者嚴行黜治無顧一家

南陵縣志

卷十一

藝文一

七

之哭果能撫字留心者亟與超擢無爲資格之限庶幾吏率其職民安其業卽有水旱之灾徵調之勞亦不致轉而之他矣臣又惟京師爲四方之極積貯乃天下之命古人效賦於京師名之灌輸言其繼繼繩繩如水不竭也今太倉銀庫歲入不過二百餘萬已爲空乏之甚至於京倉所蓄僅足二年之用通倉已不及一月支放六軍萬姓咸仰給於此而各邊之空運四方之賑貸又無不取足於此不聞其灌輸以入但見其飛輓以出歲用如之何其不匱耶臣查得漕



糧四百萬全運本色乃祖宗舊制比來停留收折僅二百六十餘萬虧損京儲莫此爲甚該戶部題爲償運糧儲事奉聖旨是今後再有將糧米奏減折銀的條部科卽時叅奏重治欽此給事中趙鏘御史高應芳節次題請覆奉欽依諸臣自當仰體聖心亟爲議復乃猶玩愒如故皆以爲船隻廢壞旗軍缺少故漕運諸臣樂於收折憚於更新非獨水旱寇患致然也此則總漕都御史等官不能辭其責矣自今歲始乞將漕運糧米盡復本色嚴責總漕等官令查理船隻南陵縣志

卷十一

藝文一

八

處補旗軍以圖漸次修復務足四百萬原額毋得屢乞明旨臨期推調行之數年廩有餘積將何爲而不成哉此固克實京師之急務也臣待罪該科目視匱詘不容緘默伏乞聖明俯賜施行臣無任戰慄祈懇之至奉聖旨戶部勘覆

周

詩 錢塘人邑令

乞除南陵縣養馬疏

邑民劉瓚等詣闕奏

奏爲乞查舊規祛偏累丐聖澤以甦民苦事臣寧國一府轄宣城涇縣寧國旌德太平及臣南陵六縣地

界萬山之中原無草場額不養馬止立織染局一所  
六縣每年織造素緞八百疋三年改造花緞一千疋  
又科六縣田地每田三畝起馬草一包除宣城五縣  
外本縣田地科馬草一十五萬四千三百包零每年  
折徵銀四千一百七十五兩亦緣不曾養馬之故此  
有隣界太平府所轄當塗蕪湖繁昌三縣額有牧馬  
草場派養駝騾馬匹以繁昌一縣言之今養馬二百  
匹其槩縣草場共七千一百九十畝大約草場三十  
六畝養馬一匹緣此太平一府並無織造衙門及馬

南陵縣志

卷十一

藝文一

九

草銀兩此則哀多益寡以有准無萬世無弊之制也  
先年以繁昌路濱大江號爲衝煩寧國府六縣稍稱  
僻靜每年幫貼繁昌江夫二百名三山巡檢司弓兵  
三十名共二百三十名每名工食銀四兩共銀九百  
二十兩此亦以逸助勞以僻濟衝萬世無弊之制也  
洪熙年間繁昌縣將種馬六十三匹權與本縣寄養  
議將新林草場四百五十畝零分與本縣管業彼時  
認是公家之務馬匹不多承領喂養豈料年復一年  
將駒作種迄今添成種馬七百五十匹照丁養馬馬

頭喂養貼戶幫貼草料每馬一匹每年出辦草料銀六兩共費銀四千五百兩因江南馬匹矮小不堪起依每年起解備用馬銀三千七百兩又騎操大馬七匹半例於江北買俵每年費銀四百兩共費銀八千六兩而每年解銀官吏之盤纏管馬官吏之查點科罰南太僕寺之比較印馬察院之印烙退補不在此數向所議撥繁昌縣新林草場四百五十畝本縣隔越不便執業仍是繁昌豪民管占收花是養馬節本縣歲費不下萬金矣近者江路險惡公差使客俱

南陵縣志

卷十一

藝文一

十

由陸路繁昌遂成僻地本縣東接吳浙西通楚粵南會閩婺北達兩京殆無虛日因之每年編派接遞人夫四百名每名工食銀一十二兩通共費銀四千八百兩所養官馬不敢入遞另編接遞馬六十四匹每匹工食銀三十六兩通費銀二千二百四十兩以至勘合火牌應辦廩給口糧中伙下程無時休息是本縣衝要一節歲費又不下萬金矣近年宣城縣平於額外那派本縣糧米七百石軍需銀一千五百兩夫南陵一縣始之以額不養馬因同宣城五縣共供織

造馬草宜矣今既養馬而織造馬草之供尙存也始之以僻靜不通往來因同五縣協助繁昌江夫弓兵宜矣今既衝要而求如繁昌昔年之得協助於他郡未有也昔也止受寄繁昌六十三匹之種馬而議分新林四百五十畝之草場今種馬加至十倍而并其向之所給草場無有也宣城以額外那派本縣糧米七百石軍需銀一千五百兩乃本縣養馬衝要二事宣城等五縣所無獨未蒙有憐其偏累者是以利歸繁昌害鍾本郡富在五縣貧累南陵膏脂竭於官馬

筋力罄於接遞富者日貧貧者日散閭閻凋耗盜賊生發職此之由如蒙皇上憫此一方之民獨受偏虧之累乞勅兵部轉行撫按多方區處事各有原物終歸本不受繁昌之草場則以本縣馬匹全歸繁昌牧養可也如謂莫非王土不獨累繁昌則當以原寄六十三匹種馬歸之繁昌而餘下六百八十七匹之馬均派宣城五縣可也馬草之徵織造之說凡以昔不養馬之故今馬不可去則是二者之供謂宜獨免南陵而均攤於五縣江夫弓兵之銀昔以濟繁昌之衝

今衝歸本縣則是五縣江夫弓兵之力謂宜輟濟繁  
昌而獨助於南陵仍乞天語行勘衙門毋拘近日之  
成案而倣國初之舊制毋憚一時之更張而酌近日  
之事勢每年平多二萬之費則宜損益於一府之中  
而使之得其平則庶幾膏澤均沾覆盆蒙照矣奏准  
行查是否繁昌權寄卽今應作何處分

附記本邑原無草蕩額不養馬明洪熙元年繁昌  
縣寄養馬六十三匹分與新林草場四百五十畝  
弘治中給事中倪天民派虹縣馬增至七百五十  
匹歲課駒二百匹存否孽育不問正德以後並收  
折色歲徵銀二千七百兩種馬倒死賠償不費重  
爲民困嘉靖四十三年知縣周詩撰疏民人劉瓚

南陵縣志

卷十一

藝文一

十二

詣闕奏聞始將孳生馬六百八十七匹變價八千  
二百四十四兩解部仍存種馬六十三匹隆慶一  
年奉例變賣種馬三十一匹價銀三百一十兩萬  
曆九年知縣沈堯中申將種馬盡行變價馬三十  
二匹價銀三百二十四兩解訖仍存折色備用草  
料每歲徵銀三千二百一十六兩雖輸額外之征  
然視昔牧養賠償  
勞費則稍紓矣

秦邦修

邑人文學

乞均糧疏

邑民俞美用等詣闕奏

謹奏爲乞恩比例均糧革弊甦民事切照本縣田惟  
一等而糧則不同致引奸人作弊而細民受辜洪武  
之初相田肥瘠立則徵糧深爲民便柰何後來法久

弊生以輕爲重以有爲無弊端迭出難以悉舉本縣原額官民田地山塘蕩塌六千四百九十八頃餘畝輕重等則科糧自七升起至五升止每年共徵正平稅糧二萬六千一百餘石馬草一十五萬四千三百二包七斤軍需均徭里甲下程等項每歲徵銀一萬二千餘兩每年民壯水馬夫漢遞人夫一千餘名走遞馬五十餘匹費銀萬兩額外又被太平府繁昌縣初年寄養馬六十匹今來陸續增至七百五十四匹每年徵運備用解扛銀三千餘兩及印烙使用倒失賠

南陵縣志

卷十一

藝文一

十三

償甚爲民害大則傾家破產小則鬻女賣男家戶皆然尤當痛恤又有北部不時坐派急缺緞疋及新增軍馬民壯折銀等項歲徵銀二萬餘兩前項科徵俱從田上派辦以有限之田地當無窮之差徭欲民不歎且亾其可得乎加之以大造黃冊之年奸民行賄里書玩法變亂等則飛詭田糧富者田連阡陌而糧不滿石貧者地無立錫而差不虛日甚者家無一分而戶載百畝家有數頃而戶無半分有開十收一中途隱漏者有開無收全不入冊者以致槩縣田糧畝

樂不均近今查得田少數萬而糧折數千以致每年糧長徵收不穀起運莫不傾產代賠前項情弊俱有存縣案卷及邇年徵糧賬簿可查但據村落蕭然十室九空弊害不言可見痛恤膏腴之地偏富奸弊之家累害良善之人賠贖國家之課見有作弊人戶沈友良等欺隱田地至於百頃今被秦邦修王廷茂等首告撫按府縣狀卷可憑切思小民事上之道不過有田納糧有身當差而已今乃家有田者無糧戶有糧者無田歷年已久沿襲已成弊根盤錯卒難剪按

南陵縣志

卷十一

藝文一

十四

查得隣近繁昌銅陵高淳等縣亦因等則不均欺隱田糧俱各具情奏准差官丈量清出欺隱及見存田地不分高下均爲一則是以奸民無所牖其弊愚民不致受其辜徵納兩便弊根可除及思本縣坐臨衝要往來使客絡繹不絕縣官迎送歲無虛日雖識民間利弊不暇爲民興革臣等深維弊害心切不甘伏望皇上痛恤民隱洞察奸弊拯救倒懸乞勅戶部轉行巡撫衙門行委清廉勤慎官員行提本縣耆民陶

旭四等并知因周惠等臨坵履段逐一丈量審實是

誰戶下是誰管業清出欺隱然後共計該縣實在田地若干原額糧差若干比例一則均派辦納逐戶給與印信由票另造黃冊奏報定爲不刊之典如此庶民無逃亾田無欺隱國課易足而公事早完矣嘉靖三十年十一月十八日奏

孫應奎

戶部尚書

奏覆南陵縣乞均糧疏

嘉靖三十年十二月十三日戶部尚書臣孫應奎等題奏看得南陵縣民俞美用等奏稱田糧不均要行

南陵縣志

卷十

藝文一

十五

逐畝丈量均攤稅糧一節爲炤天下府州縣田有定畝賦有定數計畝科糧一定之法那移飛詭律例昭然各有一定之規豈容使有不均之嘆奈何人情玩愒法久弊生或有田去糧存而甘爲富室所買者或有有田無糧而欺瞞得計者或里書受賄而飛洒或開收不明而混亂隱匿展轉相沿莫可究稽負累貧窮誠爲可憫雖十年一造黃冊然有司率以此爲大務止憑里書造報竟成故事俞美用所奏不爲無因然亦恐不止邵陽南陵爲然其嘉靖十三年二十四



等年陝西民楊林河南民原佐奏詞已經行勘去後  
延今未報查得均田糧事關民瘼一勞永逸誠公平  
之政也若使得人料理則富豪有田無糧者不得專  
欺隱之私貧民無田有糧者得以免包賠之苦催科  
甚易公私俱便實保愛元元百世之利也通議設處  
合候命下本部移咨各省及南北直隸各巡撫都御  
史及咨都察院轉行各該巡按御史務責委布政司  
并南北直隸各該掌印分守管糧廉正任事之官責  
委各州縣素有才望能幹正官將田逐一查勘內除

南陵縣志

卷十一

藝文一

十六

各省田糧原清民無異詞不便於均者不必一槩丈  
量致生騷擾外但有如前不均等處富豪有田無糧  
貧民無田有糧致累百姓包賠逼勒外竄者卽弔取  
歷年賦役黃冊與應查地糧文卷到官督同各該有  
司掌印官較定官尺拘集各里排年里老并年老知  
識人等先責令報出某里原額田地若干內有糧田  
地若干又有無糧田地若干自某處起某處止四至  
明白各造魚鱗格眼文冊明白卽地界上定立牌樞  
明書地主姓名畝數在上然後委廉正府佐二并州

縣正官如本縣正官才不堪用者另委別州縣正官  
幹理務要公同各該里甲眼同逐一沿坵履畝從公  
丈量要見實有田地若干比之原額有無增損稅糧  
有無添減中間如有無糧田地許卽首出並不追徵  
先年收過籽粒量過田地之處卽立小石碣封記以  
防奸民那移之弊各里通完然後總計各州縣原額  
田地若干稅糧若干好田若干瘠田若干炤依彼中  
田糧則例令各府委同該州該縣官親定田糧上中  
下等級照畝均攤不許轉委州縣佐二及陰醫等官  
南陵縣志

卷十一

藝文一

十七

以滋多弊如有隱匿那移等項情弊許諸人許告就  
將許民田地給償仍追先年花利并將本地四隣及  
該甲該里戶頭人等通行連坐從重問罪改正施行  
不許聽信積年里書通同欺隱地段或那移地界本  
縣民田詐作軍田本戶河泊詐作沙壓本縣未量冒  
稱已量互相作弊仍前不均致起後詞者罪有攸歸  
原委官員務要體恤民隱酌處停當大抵均糧之法  
只是以有餘補不足惟在不失原額不許分外加增  
隨時處宜惟在得人而已事完通將丈量均攤過田

糧數目分析明白造冊奏繳清冊送部查考以後如遇大造黃冊之年將均過田地糧數造入各里甲格眼圖內以備查照奉聖旨是

許夢熊

邑人工部主事

### 郵商疏

臣於萬曆七年十二月內奉命督理易州龍灣廠務比到任接管行事遵將八年分御用大炭照舊募商領價辦納連日出給告示無有應之者及拘到舊舖戶孫潮等連名告稱近年衙門官多用費浩繁所領

商陵縣志

卷十一

藝文一

十八

價銀不穀上納以致舖戶王尙能縊歿靈濟宮陳瑤等見在乞化上年東關地方有民張浩因應炭一千當夜自盡况兼近處山場空乏出關採辦輒被官軍阻撓僅存潮等數戶力實不支懇乞放免回籍當差等因具狀到臣臣不勝駭愕以爲聖明在上法紀昭森大小臣工罔不兢兢奉公秉度况惜薪司在輦轂之下寧獨不畏朝廷再三勉諭始肯承役而就肩挑買賣漿酪傭匠之家皆取充數至領價之日又復哀懇推挨押送上京交納如赴謫戍及臣默記姓名親

爲查勘或將房屋折卸或將墳樹砍伐或將男女僱  
賣以充舖填常例打點擇納之費目擊街巷半空生  
意寂寞而各商情詞爲不誣也臣因於每撥批回之  
目稽其使用之數有掌廠有貼廠有副貼廠員役姓  
名無慮百數十有公禮有私禮有額外禮一撥使用  
奚止數百金而腳頭刁蹬稍不滿欲輒將成炭敲碎  
大秤過收遮奪餘炭每萬之賠費者又不在正例之  
數焉雖內中時有忠廉渠衆亦不受約束不容商人  
控訴其凌制窘辱之狀又不可一言盡也且臣解批

定爲五撥而彼故定爲十撥蓋多一撥則多一番常  
例有不依聽勒措不收商人往返愁鬱畧無寧時臣  
何忍坐視而不一爲之動心乎臣伏思祖宗節愛之  
意以惜薪名司誠念百姓輸辦之難欲當事者知所  
樽節耳然惜薪當自惜商始今商困矣薪安所出我  
國家享祚億萬年今本廠之役僅百餘年而商之凶  
去者過半若不及今撫借酌處安集則後此無疆之  
供應將安繼乎此臣所以不畏衆口之忿詈而懇請  
於君父之前也我皇上如鑒臣愚誠所言必不敢謬

伏乞勅下工部酌議將每年上納大炭定爲撥次秤收之日或比照別衙門事例差官鑒驗其管收內臣乞查照祖宗原額坐定員名餘如陸續新添冗員相沿弊例痛行裁革揀剩碎炭給還木商仍乞申飭地方官軍不得將應採山本槩阻官窰庶困頓甦供應可前不惟我皇上法行自近恩被無疆而奉差部臣亦得盡職分而少塞曠瘼之咎矣爲此具本差典吏李思孔親齋謹題

培聖德疏

南陵縣志

卷十一

藝文一

二十

臣一介草茅幸生盛際仰窺我皇上勵精圖治之心與左右忠賢輔理之助亦旣升斯世於大猷矣乃區區杞人之愚觸於邸報所傳及臣職掌所係者則猶不能以無言焉蓋識雖淺而根本之慮則深謀若疎而狗馬之心實切譬諸野人芹曝之獻非至尊所乏無而一念殷殷則有不容以或忽者惟聖明察焉夫臣所欲言者何一曰慎臣伏思我先皇陟遐皇上甫當冲齡中外人情慄慄危懼以爲祖宗莫大之基業僅托於皇上之一身皇上安則社稷安兩宮聖母百

官萬姓安也今藉天地祖宗之靈聖母師保之力聖  
躬日就壯盛克堪負荷之重羣情莫不欣慰以爲萬  
曆無疆之祚端可卜矣皇上於此宜益厚自愛重一  
舉足而不敢忘孝敬兢兢翼翼以奉父母之遺體以  
保祖宗社稷之身以永副億兆生靈之翼戴清燕之  
餘萬幾之暇則凝承冲默親近儒臣屏去非惑早毓  
聖嗣茂衍鴻緒以爲本支百世之計遠媿唐虞綦隆  
近比祖宗上壽斯上聖之迓觀敷天所共祝也有如  
近日所傳禁中馳馬一事若果有之萬一苔石峻滑  
馭非調良或有疎轡蹄齧之患勢將奈何漢臣薛廣  
德曰陛下縱不自愛如高廟神靈何此臣所以中夜  
寒心而幸皇上之無此爾臣聞千金之子坐不垂堂  
神龍出淵蛇虺得而狎之皇上深居法宮出警入蹕  
忠賢在御儀衛日嚴猶懼有弗慎者在也乃如一二  
群小導皇上以夜遊聖母不知師保不預皇上或因  
忿遷怒此曹無骨肉妻子之戀非有心脅憑信之誠  
安保其無他念哉漢明帝因怒自撞郎官其臣梁崧

曰天子穆穆諸侯皇皇未聞人君自起撞郎帝怒隨

止臣願皇上以禮自持舉動必慎如明帝之自起撞  
郎不足效也且聞古之聖君刀劍戶牖莫非箴銘未  
聞以兵杖短棍爲娛者也聞齊明盛服尊嚴若神者  
矣未聞釋去法服着窄衣短衫以便逸樂者也聞左  
右侍御皆正人吉士未聞日與嬖近遨遊怠於政事  
者也昔漢文帝以鄧通戲殿上必令其請丞相受責  
周官寺人趣馬掌於宮正而太宰以大臣臨之是故  
宮府一心奸邪有所忌憚而不敢導人主爲非此哲  
王之懿矩也臣願自今事無大小人無忠邪皆付外

南陵縣志

卷十一

藝文一

二五

廷從輔弼大臣處分一言一動師保是臨則皇上永  
無過舉如孫海客用亦永保富貴無此謫逐之行矣  
今左右近侍不皆孫海客用也如尙有之乞皇上一  
併簡斥以安忠慎之心以杜奸宄之漸而堯舜君臣  
之盛可快覩也惟陛下毅然行之勿聽其哀懇而憐  
庇之幸甚其二曰儉臣惟創業之君多起自民間知  
稼穡之艱難閭閻之疾苦一錢一帛視爲民脂不忍  
妄用故人心愛戴天命攸歸至於子孫習享盈成見  
府庫之充溢怠積累之有年侈心一生揮如糞土祖

宗以千百計後世則以千萬爲十百矣祖宗以養賢  
馭功後世則以濫賞爲恣奉享矣一旦帑藏告匱司  
國計者畢智殫心稍復盈數而人主耗費如前小民  
不復有措人心由此以漸失天命因之以改移著之  
史冊可鑒已我祖宗積世二百餘年城郭宮室宗廟  
百官封建邊藩邦國大小之用無一不出之於民亦  
可謂地無遺利矣頃者水旱屢仍閭閻蕭索當事者  
皇皇無計欲盡寬以爲民則愛國賈欲按額以裕國  
則憂民艱其多方酌議以待邦家之用非易易也皇

南陵縣志

卷十一

藝文一

二十三

上數年加意節儉以需軍國之急亦非易易也乃百  
姓經營變奏剗鬻朽腹揮淚摧心以應有司之催科  
荷政尤有不忍言者焉故今倉若少充而臣竊憂其  
不繼在此時痛加撙節雖顆粒錙銖必爲愛惜以甦  
民生而祈天意以防戎鹵不測之需猶懼其不支也  
奈何於可已可緩之費輒取銀二十萬雖司農給舍  
爭之猶必足十五之數我皇上豈於四方水旱災奏  
一未之省乎彼時絀不能舉羸歲凶減膳樂以與民  
同憂者何爲也漢文帝時築露臺召匠計之須百金



歎曰百金中家十人之產也遂止宋太祖以公正侈  
爲服節而勉之以惜福韓侯一敝袴也以待有功此  
皆賢主恭儉之德輔臣載之帝鑒圖說皇上所嘉納  
者也今奚不檢閱而見之躬行乎臣聞君者表也臣  
下影也君務行節儉而其下不敢貪墨猶之樹直表  
而得直影也我皇上雅慕節儉而不務見之實行是  
以一時有司諸臣不務惜民而務各厭其欲姑就臣  
所職惜薪司大炭每年除正價採運之外而鋪填常  
例商人率破產賠償百千成群多方凌虐雖主者之

賢亦莫能制焉在輦轂之下法紀所自始猶然侈肆  
若此而可以訓四方之節儉也哉故臣願皇上思祖  
宗惜財命名之意納輔臣將順儉德之忠萬分撙節  
以寬惠困窮痛治貪殘以獎勵廉耻則有司庶職皆  
興起素絲羔羊之風而黷貨殃民者自遠矣人心天  
命有不永懷而永固者哉抑臣猶有願焉我皇上臨  
御八年未嘗一有疏闕固以天章純粹聖學日新而  
聖母惓惓之慈訓輔臣蹇蹇之忠誠所以維持左右  
於其間者尤不可一日忘也今幸而內順外嚴治登

於泰矣亦思母子君臣永堅一念以共保泰於無疆乎昔傅說訓於高宗曰木從繩則正后從諫則聖我皇上諭臣以進諫矣盍亦思大小臣工得批鱗犯顏時時陳保泰之說於皇上之前乎蓋股肱大臣既有心腹之勢而調元贊化於中耳目群臣復有骨鯁之節而宣德達情於下勿間於浮議勿安於小康使我祖宗艱難之業滋久滋昌與天無極則斯世斯民之至願也亦臣之至願也

崇正學疏

南陵縣志

卷十一

藝文一

二十五

臣聞帝王之治必祖唐虞而之所以爲學必師孔孟蓋唐虞之世其君澹然無欲一切營營之感不入於心故化理醇而臻上壽萬世之稱帝王者必首焉孔孟之學本諸精一之傳而措之於日用切近諸不在六經之科者不以爲訓故天下道德一而風俗同萬世之爲帝王者必師焉洪惟我皇上夙秉至性嘉慕前修尊禮師儒講求理道其於聖賢之學術帝王之治法蓋津津然直觀其奧而非尋常叔季之君所能彷彿於萬一矣但臣有一二仰窺聖心之易動而竊

慮聖學之未純焉欲爲皇上陳之則事機若微恐忤  
宸聽欲弗爲皇上陳之則忠臣愛君必防其漸語曰  
涓涓不已終成江河臣言又似不能已皇上試宥臣  
之愚昧而垂聽焉臣聞至尊莫如天人君代天而爲  
之子故稱天子今黃冠道士張國祥者古巫祝之流  
耳乃對衆庶而稱天師此而稱天非尊無二上之義  
也人臣事君由一命以上積資累考稱職無過然後  
循階而陟之自九品以至一品不啻九淵之望天際  
也今國祥以童豎之年素無勛伐一二陟之崇階齒  
南陵縣志

卷十一

藝文一

二十六

於公卿大臣之列使滿朝耻於爲伍得無非分而僭  
越乎此臣所謂憂其漸之逼而得肆其邪媚之說熒  
惑聖心將使皇上之道駁雜而不純如漢武帝宋道  
君故事其爲聖學之累不小雖其教相沿非自今始  
然明先王之道以正千古之非闢異端之邪以尊六  
經之教如韓愈所謂人其人火其書廬其居使天下  
帖然知國家專以帝王聖賢爲法以禮義綱常爲治  
亦在大聖人之作爲耳惟皇上御極以來最慎賞賚  
非左右忠賢久著勞伐內安社稷外靖疆場者不得

服玉帶今國祥以降革之餘特蒙恩復雖合門祝讚  
捐軀圖報亦其分也乃一供醮事卽恬然受上賞而  
不辭侈然班縉紳而不讓忠而有禮者固如是乎昔  
韓昭侯藏敝袴以待有功今玉帶非特一敝袴也皇  
上卽憐而賜之設有大功烈大勛勞保皇躬奠鼎祚  
於億萬年之安者皇上復何物以賞之耶以賜道童  
者而賜勛臣臣固知其不以爲榮勸也且天下藩臬  
諸臣先師聖賢之裔四夔酋長莫不以入賀而來萬  
口嵩呼同心祝戴皆以臣子之分宜爾無敢希望皇

南陵縣志

卷十一

藝文一

二十七

上之勞賞者獨國祥蒙此殊賚豈惟手足一體之恩  
卽四夔遠人見之將謂中國崇老氏而卑孔孟優童  
孺而忽老成其所關係非小矧春秋之義庶方小侯  
不敢入居王人之右大夫位卑得以出監方伯之國  
凡以尊朝廷而嚴堂陛也今國祥以小道外來雖朝  
廷賜之秩當自與其流屬爲序不得無事輒入朝班  
越王人之上而傷內外之體臣願勅下禮官酌議俾  
其循分知讓庶體統以正群情以安臣又聞東南水  
滂百姓告饑當事之臣救禦無策臺省諸臣亦旣屢

厘宸慮矣方此之際枵腹之民得斗粟可以崇朝得一金可以卒歲皇上何不以真人之賜爲熒獨之哀卽不能家給人益而萬姓之欣戴奚止如一人之懷惠已耶臣嘗莊誦皇上所撰十三事曰敬天戒曰樽節用竊仰嘆聖人之學如此乎知所務也今天心示儆水滂爲灾財絀民窮尤當搏節正神堯警予之時成湯責己之日將修省之不遑儉約之弗克又奚暇於媚福而耗賞耶臣願皇上顧繹初心始終典學察帝王中正之道重民生日用之倫純任經術以親賢

臣勤修政事以任賢能毋弛務於荒誕不經非常可喜之事以求放心念天心之仁愛而警戒無虞思稼穡之艱難而節省備至起居出入罔有不飲飲食璧御罔有不慎一動一履勿貽聖母之憂一言一行勿忘師保之訓則聖志堅定如水之不波聖壽彌臻如川之方至將億萬年無疆之休媿美唐虞而熙朝大一統之治卓越千古矣臣愚昧輒叩蟻誠仰干天聽如蒙聖明俯納乞將玉帶收回或命恭捧還家供奉不得尋常諱服玩褻聖恩更乞皇上併採芻蕘將臣



俱屬毛而離裏忍絕裾以滅親豺獮尙有一祭之私  
介冑豈無三年之愛按先王制典未見分途愬季世  
搶攘因而異議臣未窺故典不知始於何年但竊念  
綱常似應定爲畫一先朝舊例聖世宜更今海宇昇  
平兔罝皆干城之選禮樂大備忠孝總天地之經王  
道本乎人情時宜合乎天則臣久失怙恃見素鞅以  
興思恭際 聖明瀝丹心而上請實爲天下萬世之  
公論非爲孫斌一人之私情伏懇我

皇上特渙綸音定武職三年通喪之例以光史冊爲  
南陵縣志

卷十一

藝文一

三十

熙朝萬載孝治之隆至有寵眷獨尊或奪情而留任  
亦出睿裁曠典奉 特旨以生榮則仁孝推及萬世

而謨猷超於前古矣

康熙二十四年十月二十二日  
題二十五年二月十二日兵部

覆題奉  
旨依議

林之濬 江南督學

請政南陵縣爲大學疏

謹題爲循例請廣入學之額以崇文教事竊臣瀕海  
下士荷蒙 特簡視學江南巡歷各郡伏見人文蔚

起皆由我

皇上數十年培養之恩兼增廣入學之數是以童稚  
學寒咸思砥礪誠千載一時之盛也茲據寧國府知  
府佟賦偉詳據南陵縣學生員劉景等呈稱凡進取  
人才以賦稅之多寡定入學之額數寧郡六邑首宣  
城次南陵次涇縣查南陵額徵賦稅四萬有奇涇縣  
僅二萬六千兩涇縣同宣城爲大學南陵抑爲中學  
每遇歲科南陵應童子試者數浮於涇數多額少叩  
乞題改大學等情到臣隨經批行安徽布政司確查  
去後今據安徽布政使司年希堯詳稱南邑錢糧較

南陵縣志

卷十一

藝文一

三十一

涇將倍而人支亦盛於涇應照康熙四十八年間河  
南學臣湯右曾以陝州葉縣之錢糧多於信陽請增  
入學額數之例懇請具題等情到臣該臣等看得南  
陵人才實衆而額徵賦稅委多於涇而歲科取進抑  
爲中學校閩之下未免遺珠似應一視同仁改爲大  
學則士氣益奮文治彌光矣臣謹會同江南江西總  
督臣常鼎安徽巡撫臣李成龍合詞具題伏乞 睿

緊勅部議覆施行

康熙五十六年十月二十四日題

五十七年二月十五日奉

旨依議

旨該部議奏

題本月十五日奉

旨依議





巽輒有公懇干犯崇嚴據本縣進士張基等狀稱切見本縣有工山祠血食歲久凡有雨暘愆伏官民求禱無不靈驗前後申請朝廷重加封號廟曰廣惠侯號曰冲真顯貺自去年夏秋亢旱官民虔禱雖小雨隨應未免終旱止緣廟後創興鐵冶鑿斷山谷耗泄氣脈驚觸神靈作壞風水以至灾害今歲自春至五月雨乃艱得田土龜坼見種秧苗無水栽蒔深慮得雨後時幾至失業伏暗縣廳設醮爲民祈禱基等所見若不任罷鐵爐恐徒竭至誠未能響應况所鑿之

南陵縣志

卷十一

藝文一

三十三

山正是本縣來龍及廟主山其鐵爐課利每歲入官初不甚多乃使百里之內所禱不應早曠洊臻深爲未便考西漢貢禹嘗論工山取銅之害以其鑿地數百丈銷陰氣之精地藏空虛不能含氣出雲斬伐樹木犯冒時禁水旱之灾未有不由此也往年愚民無知獻工山爐利於官而縱民穴鑿其下惟利是嗜不恤其他侵淫歲久始在山麓今在山腹侵截地脈震驚神靈伐兩山之木以供薪炭雖稚葉柔條不得免焉神所依蔽以出雲氣者殆將無餘是工山之神且

不能自安而何暇恤吾民乎以魯恭卓茂爲令而有  
求於神亦將不兩矣堯旣據前項所述陳迹又有甚  
害敢并言之工山鐵冶以來作於爐所者皆群不逞  
亾命之徒據深山窮谷人跡不到之地恣爲奸盜私  
鑄錢遍滿境內至不可禁止今市井交易官務酒稅  
細民輸納皆鐵錢矣窟穴深秘黨類克強隣保不敢  
詰巡尉不敢捕前歲之旱堯親率官吏伏謁祠下撤  
葢徒步至於山巔周覽徘徊見其林木荒殘而山之  
高下掘鑿殆遍固嘗有意於此今又得士民所陳去

歲中夏不雨秧老未熟堯嘗默禱於神以謂神血食  
茲土有功於民何向之有靈而今之不若誠爐冶褻  
慢之故願賜甘澤倘得如應堯將明以告郡太守而  
議所以去之是夕得雨繼而連綿遂大霑洽則神之  
心亦可見矣堯尋檢照得工山爐內大澗爐自興隆  
初置至淳熙六年再置一歲課利錢一百二十貫文  
夫二百千之微利而乃有私鑄之害慢神致旱之害  
較其輕重智者不爲也用敢備錄士民所陳冒干台  
聽伏乞詳酌具申朝廷卽行住罷今苟不免以堯料

之不一三年山竭鑿盡亦將必崩罷固不若今日之罷爲愈也堯繆膺邑寄敬神愛民堯之職也

議

皇清

宋廷佐

三韓人邑令

復祀議

蓋嘗有旨於宋儒寧過仁無過義之說而竊於前令嘉禾沈君爲補其闕略云夫沈君賢令也志所稱興利除弊備極經營修治圩壩濬川潄陂以千百計迄

甯陵縣志

卷十一

藝文一

三十五

今邑稱沃土皆其力也又興學造士加意人文越百餘年而余以後起謏才承乏斯地緬厥遺徽方是則是倣之不暇而遽謂補其闕略者何居蓋因其於鄉賢中黜丁恕而退李經附安賢祠張國岡附忠義祠何應龍附孝感祠而云也夫鄉賢祠附學宮有司上丁釋奠禮畢致祭原與各專廟不同至若梵剎道院則愈非其所今安賢之祀久廢而孝感俗亦沿誤皆緇黃香火李何二公之靈不歆於彼也明矣忠義祠

爲明僉事吳景專廟而張國岡乃元人於吳爲前輩

顧使配位耐食得無使吳公蹙然耶今查國岡神主  
尚在鄉賢然自嘉禾議退之後人亦未正其名之宜  
祀鄉賢祠也李經之孝與蘇伸芳同但李言坊行矩  
見後生必循循訓以孝經曲禮之義蘇則棄俗爲安  
賢寺僧以終其身不可爲訓如之何轉以李耐蘇也  
至謂鄉賢祠有神主丁恕而舊志未載丁恕祀鄉賢  
疑恕係私入竟黜之按舊志乃嘉靖中錢令照作也  
論者病其篇章寥寂事蹟脫佚庸知恕不在脫佚內  
耶且祠有神主舊志未載亦有其人舉人同知方懋

南陵縣志

卷十一

藝文一

三六

卽范懋正與恕同何獨疑於恕而黜之耶卽名宦祠  
亦有神主周起元攷職官表與名宦傳並無其姓氏  
不知何時官斯土有何政蹟何故失載但以神主在  
未敢議去也又何以不疑舊志之未載而獨臆斷鄉  
賢丁恕爲私入耶寬以待方與周而嚴以繩丁恕後  
論恕有所不服卽所退李張諸公而耐位失宜應亦  
未遽心服揆諸古人忠厚宅心寧過仁者當不若是  
也余不揣比有事於邑乘以復諸賢祀申請郡太守  
黃公公曰允以告邑之紳縉士民亦無不曰允於是

李經何應龍丁恕諸賢乃得復祀鄉賢祠而張國圖之祀亦特釐正之今而後諸賢冥冥中其亦可以稍慰矣乎或曰沈君志在經濟鄉賢附祀偶爾失考非有意也

辯

明

汪景邑人司理

良知辨

良知良能出於性分之懿心之妙用也卽晦庵所謂

南陵縣志

卷十一

藝文一

三十七

虛靈不昧神明不測所以具衆理而應萬事者也惟其知能不待外求而妙用非由人爲是故知性知天窮神知化固知也而知至於天窮至於化亦能也能盡其性則能盡人之性能盡人之性則能盡物之性固能也而人已內外物我先後處之各適其宜亦知也是皆兼體用貫動靜合顯微而一以貫之道乎聖賢無一偏之學故無一偏之論體道同則其見道不異見道同則其立論雖少有不同要皆出于實得之學而互相發明卒同歸於道者以其心之一也會

子言致知矣子思又曰致曲致曲固推極其至之義也子思言致曲矣孟子又曰擴克擴克固所以滿其本然之量也蓋聖門之學以身體力踐爲功無揣摩假借之似以真知自得爲貴無模倣意見之私譬之海決百川之水同一水也月映萬象而萬象之月同一月也自孟子有良知良能之訓陽明乃摘出一頁字補在大學致知之中以爲致良知之學其嘉惠後學之意亦勤矣而古今讀大學者敢以致知非良知乎故以一言之善而取其一言可幾乎道可也謂一

言之善而遂可以包括聖經賢傳之旨其亦示人以不廣矣夫陽明有所激而云也亦示人以易入之門而啟其不失孩提之心也陽明豈肯以一字爲可以該盡聖賢之統旨哉蓋道一而已卷之存於一心而放之則彌六合聖賢之言得之不外乎一身推而達之可通乎天下是故以兆人文以昭帝極以範世教皆是道也堯舜禹發天之秘而有精一執中之傳湯文周孔子繼之衍而爲建中建極緝熙博約之學顏曾思孟得授受之真矣逮至濂洛濬其源紫陽會

其成幽探性命之原博觀物理之奧析之極其精而不亂合之盡其大而無餘皆聖學致知之全功也雖不言良而良自在其中矣今之學者尊其所聞行其所知顧不曰堯舜禹湯文武周公孔子之學不曰顏曾思孟程朱之學而囂囂然曰我之所學陽明致良知之學也不知陽明之學果何自耶飯香黍而背其本酌醴泉而忘其源使陽明九原有知當不忍聞斯語矣故爲之辨議者豈以好辨罪予哉

書

南陵縣志

卷十一

藝文一

三十九

明

何燧

奉巡按劉公書

燧竊念禹稷思天下有饑者猶已饑溺者猶已溺每嘆古仁人加意民物肫肫懇至非漫語也恭惟明公奉璽書出按東南任卽禹稷之任也一夫不獲是子之辜心卽禹稷之心也茲不揣地方痛痒敢代父老上達鈞聽敝縣苦於繁昌寄養馬之害相聚疾首盛額不得已奏行臺下夫馬草之徵織造之設凡以首



不養馬之故今馬不可去則是二者之供謂宜獨免  
敝縣而均攤於宣涇等五縣江夫弓兵之銀昔以濟  
繁昌之衝今衝歸敝縣則是宣涇等五縣江夫弓兵  
之力謂宜輟濟繁昌而獨助於南陵此代父老叩訴  
者一也廣總兵備之增於地方無益有害林梅墩疏  
中備矣該部極然其說而雙江翁裁革常鎮兵備之  
疏適至舉此遺彼恐不免咨行臺下覆勘近年巡撫  
公以海防爲重經年駐劄是以常鎮之痛痒相關而  
寧池一帶或不免秦越視亦勢使然也夫地方凋敝  
南陵縣志

卷十一

藝文一

四十一

省一冗員則受一分之賜矣此代父老叩訴者二也  
燿情切柔梓冒昧上聞且恐瀆閣人不敢彌封伏乞  
明公俯賜矜察爲解倒懸燿無任瞻跂之至  
奉郡守近溪羅公書

別來數月計此時久已下車平生邃養實見行事六  
邑精采當頓倍往昔欣仰欣仰敝縣養馬之累前已  
面控耆民奏訴本已投通政司此月十二日開封或  
得上月終方得下之撫按明公萬物一體之學討論  
有素此敝縣父老千載一時也仰惟俯賜鑒照力爲

凋疲燿無任感荷之至

又

做縣苦於養馬之害奏行撫按燿於秋間曾爲父老  
附啟臺下矣夫議草塲議江夫弓兵係干繁昌議織  
造議草銀係干宣城等五縣不恤嫌不避怨爲凋瘵  
更甦此做邑黃白百年遇一朝也本縣去青陽隣而  
公館當移交界處以復先年之舊偏累之民庶乎稍  
蘇尤不能無望於大仁人也廟堂此時景象一新故  
態稍稍去想公共爲國家慶區區不敢贅肅此仰祈

南陵縣志

卷十一

藝文

四十一

鈞裁

皇清

許允成

邑人孝廉

奉揚中尊罷復鄉兵書

切照臺疏以國用不足請裁撤分鎮地方兵馬以省  
供億萬一有事申飭有司訓練鄉勇自可固圉其意  
原主撤兵非增兵也地方原鄉勇在城有民壯弓兵  
在鄉有子弟民兵訓練之法在城則有司捕官操閱  
在鄉則有保正甲長演習在城者防城在鄉者防鄉

卽此古昔寓兵於農之意固圉之策莫善於此明季因四方荒亂始設鄉兵每里養兵十人計八百餘人每一兵科派工食銀十八兩歲費金錢一萬四千餘兩民間擢筋剝髓以供兵餉而充當鄉兵者皆異鄉及本境無賴之人只知嚼民不知堵賊地方無事則結黨魚休有事則乘機擄掠民受兵害無處申訴幸遇操撫部院李公洞悉厥害盡行革去數年以來始得安枕今年歲近豐四郊無警無故復設鄉兵徒爲擾民絕無實用前覆不違豈堪再踏伏懇老父母以南陵縣志

卷十一

藝文一

四十二

愛民素心詳覆院道體察臺疏本意申明舊典務收訓練實效無滋設兵巨害合邑不勝感激  
奉楊中尊酌處夫馬書

前月二十七日承老父母會集生等面諭奉按院劉憲牌下縣咨訪利弊許令直陳無隱生等切思自老父母蒞任以來留心地方興利除害俱有實效不煩請告獨夫馬一節爲近來大害亟宜籲憲振救爲此公同具揭切照南陵爲陸路極衝之地差使絡繹日無寧晷明季額設夫三百五十五名馬八十九匹編

徵里甲輸銀係歇包攬承應編徵外私派幫貼每里  
幾至十金民間至有賣妻鬻子以應差役者順治五  
年操撫部院李痛念病民力行裁革止留馬三十五  
匹夫四十五名以裁革夫馬所存銀并底馬變價銀  
置田七百七十九畝事詳馬田書冊後因差煩馬少  
僱接不敷陸續加至馬七十五匹夫六十名其買馬  
僱夫口糧草料俱在走遞夫馬二項編銀及馬田租  
穀取用計走遞差馬走遞差夫二項共該銀四千五  
百五十七兩馬田租穀共該稻一千五百五十九石

南陵縣志

卷十一

藝文一

四十三

又兼宣城協濟養馬銀六百兩動支應用儘可支持  
但因操臺立法甚嚴每有倒斃開報便懲責養馬之  
人開報煩數移怒縣官展轉查駁且報府報道報司  
報院各衙門使費打點幾與買馬之費等以後遂不  
敢報或報半或不報遇有倒斃或縣官捐俸買補或  
馬戶揭債買補其編銀租穀俱存積不敢動支登數  
報上近遂以存剩銀稻轉解他處以致夫食不充馬  
價無出夫役馬戶相繼逃亾若不急爲救正恐本邑  
倒站之憂勢且立見今計順治十三年所解八年九

年十年十一年存積夫馬銀五千五百七十兩零解  
北部存積馬田稻三千五百二十石零解儀真寧國  
等營兵餉是名爲夫馬設者實不爲夫馬用而所解  
銀稍更添一番賚解盤腳之費賠累之外又有賠累  
陵民何辜堪此重累伏懇老公祖轉請按憲從長酌  
奪以夫馬本項之銀稻供夫馬本項之應用無失當  
年立法初意則郵困得蘇倒懸得解矣臨啟悚息

方伸 邑人庶常

與劉蘧庵

南陵縣志

卷十一

藝文一

四四

接手教關心梓里利弊感切鱗羽稀少遲久未報條  
編一事便於民不便於吏又不便於包攬之棍徒與  
交通官吏之紳士是以始議至今樂行者什之九阻  
格者什之一然樂行者鄉曲之細民阻格者市井之  
奸猾細民樂行而不能言之於官奸猾日習於官巧  
言里排之利而故爲條編難行之狀以售其害不可  
破之計是阻格者什九不啻而樂行者什不一也嗚  
呼時事至此復何言哉秦塞齋葦極意挽維不惜勞  
怨弟亦從諸君子後稍稍贊末議然而中傷者已多

矣自二月至五月議論游移竟未開徵始自六月朔日每二日查比一甲輸納踴躍私心喜甚可保無他而郡丞忽提額外修理銀官民愕然搖惑之言又興矣呼吸間將有變易望速郵書當事勸勉有終則陵民之食德永永無窮矣幸留意焉

劉楷 邑人光祿卿

與屈明府言裁扣夫馬書

前拈解日衆紳士里民以補夫馬裁扣一事懇楷轉求俯賜矜憫情詞激切楷因先未奉教於左右卒然

南陵縣志

卷十一

藝文一

四十五

言之恐涉唐突故未敢盡陳數日以來熟籌此事關一邑休戚萬姓脂膏代桑梓陳情卽於侯爲忠告有不敢默默者蓋里役之困至今日而極矣舊例所應有者如軍需採辦上下年公費窮黎縱典鬻殆盡其誰敢不竭蹶趨命至夫馬裁扣久奉部文相驛地之衝僻差使之多寡斟酌再三頒行天下非但一縣一驛爲然苟裁之於上而復徵之於下扣之於前而又補之於後則在郵遞有裁扣之名而仍爲未扣未裁百姓無夫馬之責而終苦應夫應馬况補者一而羨

耗誅求不過徒飽庫吏之私橐要非計之善者也昨  
春承示核奪楷適徃白門未叅末議近聞里民云所  
收之數竟倍於所議之數民力竭矣安得不皇皇呼  
籲乎竊惟侯下車以來作養人材振興學校除清供  
之弊甦兌糧之苦善政多端每與何瑟齋言及輒感  
嘆不置實非阿所好也此事初行衆里民輸納恐後  
亦知爲暫時權宜之計第行之既久弊竇叢生古人  
有言能發能收則須通變矧侯蒞任已十餘載屈指  
榮擢只在一二年間倘異日人情齟齬輸納未必如

今日嘒嘒之口其誰能禁之相沿既久謂此弊始於  
某時某人恐亦爲盛德之累願侯圖之倘蒙鑒念平  
生察鄙言之非激審衆情之易安施惻隱之仁頒寬  
恤之令或議除或議減從此歡聲載道則所不滿者  
僅驛卒數十人而德澤遍暨於億萬人俎豆且及於  
千百世較量得失寧不倍蓰哉或曰夫馬旣裁兼比  
透支在此輩誠難但里下業代償三年不識舊欠曾  
補足否昔滇黔告變誼應急公茲羽檄不馳蕩乎在  
卽撥明事勢先後不同况此輩衣錦乘肥糜廢無度

不補不足補亦不足所可痛念者惟半菽不飽孛軸  
其空之黔首耳夫仁人在上可否伏候裁示昔昌黎  
上閣下書有云惟執事可以聞此言惟愈與執事可  
以此言進今日之謂矣翹切待命

奉楊督學言大學書

憶自迎鑿邗上與公相見話舊甚驩昨春兒燾計  
偕趨謁箭致候忱久之南中始聞拜命典學不及  
遣賀京邸入境以後風紀森嚴未敢一字濶臺吏側  
聞首頌科律崇雅黜浮兩江生徒翕然思進於通經

南陵縣志

卷十一

藝文一

四七

學古衡鑿之下公明並擅佩服何極楷竊計朝謁追  
陪握手抗談天下事惟公意氣橫出目無古人私謂  
大賢當路舉動殊常凡所以爲風教人材計者果其  
私病灼然雖百年相沿之局必將破資格疏湮鬱况  
於朝廷因時制宜例有可循者乎敝邑南陵漢以  
來江介望縣今抑居中學定額所求多士迨是文  
治光昌之世而一方獨抱向隅之悲比見中州題  
改陝州葉縣部議僉同得邀俞旨邑中人人自奮  
仰瞻公如待霖雨聞之大君子不可干以私人亦無



敢以私干之楷辱在通門風欽亮節顧目擊桑梓之  
邦士之窮經皓首枕於額隘屏不一遇者其文不盡  
出他邑下至絃誦之聲浸及比戶猶不以抑塞之故  
放棄於崇道右文之日良可矜憫而又幸逢拔滯疏  
幽以開廣賢路爲汲汲者復自引嫌杜口不爲陳請  
則非人情矣嘗讀昌黎與陸祠部書薦侯喜以下凡  
十人詞意慷慨蓋難諸子之才且成祠部之志也楷  
以爲事有大小功有遠近陸祠部得同時數人已爲  
盛事矧興起一邑而繫天下之文明作新一時而振

千秋之士氣使甯陵遂獲預大學之末將來磨礪變  
化人文蔚興不可殫計公之有造於此邦者直貽以  
百世之利也楷間攷前賢學政之最著者如赤城陳  
公浙人而人宗師之者也毘陵薛公浙之人所宗師  
之者也意衡文講藝人猶得窺其藩籬必也道大行  
而澤遠被舉三不朽兼之宜顯榮當時而尸祝奕禩  
也公意氣橫出目無古人楷所信者素矣故不敢自  
外而妄有言焉旄節式臨應迎道左綠樓遲巖谷不  
出城闈者十有六年矣知在照原臨啟瞻企

